


KIDIMBU YA KULUTILA

 [Mpangi Neville me tuba, “. . .bandandu yina Nzambi me natina beto na nzila ya ministere ya nge na kati ya zola. Beto, na ntangu yayi, ke zola kulakisa yawu, na mutindu ya fyoti, na kupesaka nge mwa dikabu.”—Mu.] Matondo na nge, Mpangi Neville. [“Bika ti balusakumunu ya Nzambi kuvwanda na zulu ya nge, mpangi-bakala ya luzolo.”] Matondo na nge, kulutila mingi, Mpangi Neville.

² Mpe matondo na beno, dibuundu. Mu zaba kaka ve yina kele na kati ya yawu. Kasi mu ke sepela, na ntima ya munu ya movimba, nionso yina beno me zola kutuba samu na munu, mpe bima yina beno me sala samu na munu. Mpe kana ya vwandaka ve samu na beno, ya zolaka vwanda ve na munu. Kana ya vwandaka ve na muntu samu na kukwikila Nsangu yina Nzambi pesaka munu samu na kulonga, ya ke vwanda ve na mfunu ya kulonga Yawu. Ya fwana vwanda zole ya beto, na kusalaka kintwadi. Na yawu, mu ke sepela kieleka mingi na yayi.

³ Dibuundu ya beto ke kuzwaka ntangu nionso, kulutila fioti, na kati-kati ya beto awa, na mutindu ya kusekisa. Ntangu yayi, ntangu mu kotaka, kaka mwa ntangu fyoti me luta, na kivinga ya manima, muntu mosi pesaka munu paké mosi, mpe yandi tubaka, mu ke kwenda na estrade mpe mu ke talisa *yayi* na Mpangi Neville. Na kuvutula matondo na bansatu ya munu na yandi, mpe kubundana ya dibuundu yayi, mpe yina yandi zolaka tuba na beto mvula yayi, mutindu pasteur na bamvula me luta, mpe kivuvu mpe bisambu yina yandi ke landila na kuvwanda pasteur ya beto bamvula mingi ke kwisa, kidimbu na dibuundu mpe munu mosi, Mpangi Neville.

⁴ [Mpangi Neville me tuba, “Matondo na beno, kulutila mingi, beno nionso. Nzambi sakumuna beno. Kieleka mu ke sepela na bima ya mutindu mpe lusalusu yina vwandaka na ntwala ya munu na nionso mpe bantu nionso na kati ya lukutakanu. Mpe ya kieleka, na suka yayi, mu ke kuwa kuna na kati ya moyo ya munu ti mosi na mosi ya nsuka ya beto ke vutula matondo mingi na Mpangi Branham samu na yina yandi zolaka tuba na beto, mpe ministere ya yandi. Mpe bika ti Nzambi kunata yandi na ntwala mpe kusakumuna yandi na yina yandi ke landila samu na Mfumu na mvula yayi, ya kele kisambu ya munu ya ndandu. Matondo na nge, kulutila mingi. Kieleka mu ke sepela na yawu. Mbote mingi.”—Mu.]

⁵ Bana ya fyoti, mbote mingi, mu banza ti bana ya fyoti ntangu yayi ke kwenda na bivinga ya bawu—ya bawu. [Mpangi Neville me tuba, “Ya kele kieleka.”—Mu.] Mpe ntangu yayi beno bambuka moyo, beno vwanda bana-bakento ya mbote mingi

mpe bana-babakala, kuna na kivinga na suka yayi. Samu ti, na manima ya lukutakanu, mu banza ti ya ke talana mutindu ti ya vwandaka na kima me bikana awa samu na beno, na kusala.

⁶ Ntangu yayi, samu na bakuluntu, mutindu beno ke mona bantu ya beto—ya beto ya bantwenia kele—kele lutangu ya fyoti, beto kele ntima tiya-tiya ke na kvingila tii ntangu yina beto lenda kuzwa dibuundu ya malu-malu kisika beto lenda kabula bakalasi yayi.

⁷ Mpangi ya beto ya kento Arnold kele na diboko ya yinda; diboko mosi ve, kasi diboko ya yinda. Mpe mwa mwana ya munu ya kento vwandaka tuba na munu. Yandi tubaka, “Papa, ya kele mpasi mingi na Mpangi-kento Arnold.” Yandi tubaka, “Samu ti, yandi ke na kuzonzaka na beto na nzonzolo yina beto ke bakula, mpe na yina mwa kutenga-tenga ke sala kima mosi, mpe yandi ke telema mpe ke sungika yawu, beno me mona.” Na yina ya ke sala yawu mpasi na zulu ya kento yayi samu na kuzwa kalasi yayi nionso. Na yawu beto ke sepela na yandi, mpe ngwisani ya yandi—ya yandi ya mbote na kusala yina yandi lenda na ntangu yayi ya nsatu. Mfumu sakumuna yandi.

⁸ Ntangu yayi beto ke tula kivuvu, kilumbu mosi, ntama mingi ve, kana Mfumu kuzola, samu na kuzwa tabernacle ya nene kisika beto ke kuzwa bivinga ya lukolo ya Lumingu ya mutindu na mutindu. Samu na ba-bébé ya fioti, na tablo ya flanelle; mpe beto me kuzwa na zulu ya chaire, na zulu ya *yayi*, kivinga ya nene ya bana na vitre, kisika infirmiere yina me longukaka ke vwanda kuna samu na kukeba bana nionso ya fioti. Ya ke vwanda ve na nkakalakani na kati ya bisalu, na nionso, na kutambula to kuluta. Bana yayi ya fyoti kele ya kupema ve, mpe bawu ke bakula ve. Bawu fwana bakula bawu. Bawu lenda ve kubakula beto. Mpe na yawu, kuna, kisika nyonso ke vwanda kaka mutindu mu ke kwikila ti Mfumu ke sala beto kusala yawu. Beto ke vwanda ve ya galasi, kasi dibuundu ya mbote. Beto ke na kvingila na yawu.

⁹ Ntangu yayi, samu na Mpangi Neville mpe munu mosi, mu me baka kaka dibanza mosi, bayayi vwandaka na bilele ya kitoko. Mu zaba ve, Mpangi Neville. [Mpangi Neville me tuba, “Yayi, to kima mosi.”—Mu.] Mu—mu banza ti ya kele yawu. Mu ke ndima ve. Samu ti, ya ke talana mutindu sanduku, samu na munu. Beno ke kuwaka ve mutindu mosi samu na yawu? Uh-huh. Mpe ya kele ba-costume to bakazaka. Mpe mu—mu. . . Nionso zole ke talana mutindu mosi, na yawu ya—ya ke lakisa ti ya kele ve na buzitu ya muntu awa. Mpe, na yawu, mu kele na kazaka. Mpe mu zaba ti bawu—bawu. . . Ya kele ve kazaka. Na yawu ya. . . Beno kele na mosi, mpe, na yina ya fwana vwanda kazaka. Mpe ya kele kaka. . . Beto ke sepelaka mingi na yayi!

¹⁰ Mpe mu ke kwikila, ti, mutindu ba-pasteur, mivungi, mpova *pasteur* zola kutuba “muvungi, mosi yina ke twadisaka

mameme,” Mu ke kwikila ti beto ke vutula matondo na beno, mosi na mosi ya beno, samu ti ya vwandaka—ya vwandaka lutondo mpe mabanza ya beno, mpe mbongo, yina salaka dikabu yayi kusalama na beto na suka yayi. Mpe na nzila ya lemvo ya Nzambi, beto ke pesa nsilulu ya beto mosi na kuvwanda pasteur ya beno, samu na kusala nyonso yina beto lenda samu na kutwadisa beno na nzila ya mbote. Mu banza, bantangu yankaka, mutindu beto ke zonzaka mpe nyonso, ya lendaka vwanda mpasi na kubakula. Kasi beto ke sala kaka yawu mutindu bantwadisi, samu na kumeka kutwadisa beno na Kisika yina, ti, na mvumbukulu nge ke sepela na beto mingi kuna. Na yina, beto ke talaka ve bayembe ya beto mosi, na kusalaka ntangu beto ke zonza na beno, ve na mabanza ya beto mosi, kasi kumeka na kusala kaka mutindu Mpeve-Santu ke twadisa beto na kusala. Mpe ya kele ya beto . . . beto ke sala kingolo-ngolo. Mpe beto ke sala kaka kingolo-ngolo na kusala kima mutindu mosi, yina kele ya mbote, samu na pasteur mpe munu mosi.

¹¹ Beto ke vutula matondo na kumona mwini. Doc, mpangi ya munu ya bakala, vwandaka tuba kaka ti yandi fidisaka ndinga na Mpangi Frankie Weber, na Floride, tubaka, “Ve mosi kaka yina lendaka basika na Nowele mpe kusukula pare-brise, ya ditoma ya yandi, na maboko ya simisi ya yandi.” Yandi vwandaka sala kima mutindu mosi, na yawu tiya! Mbote, beno zaba ti Floride me lemba na mwini, ke na kutalaka na Floride ntangu nyonso, na yawu ya fwana mata na Indiana mpe kumona mutindu nyonso ke na kubelama awa. Beno banza mutindu yina ve? Na yawu, beto kele na kyese ti ya pesaka beto kutala, na—na mwa ntangu fyoti, na suka yayi.

¹² Kasi, na zulu ya bima nyonso, beto ke vutula matondo samu na Nsemo ya Mwana ya Nzambi, yina ke pesaka beto kulezima ya nsoni ya Seko.

¹³ Mu ke kukiyufula kana mwana-bakala yayi ya ntwenia, yina me kwisa, lendaka vwanda na bibuti ya yandi. To, ya kele na kalasi ya lukolo ya Lumingu na manima, mwa muntu, kana beno zola kuvutuka kuna. Mpangi Taylor, nge ke twadisa mwana-bakala ya ntwenya na kalasi. Ya kele mbote. Bantangu yankaka bawu ke zolaka kuvwanda na bawu mosi, beno zaba. Bawu, bawu kele na bima na mutindu nyonso, yina bawu zola kuzonzila. Mpe ya kele kaka mutindu yina.

¹⁴ Mwa mwana ya kento ya bamvula kumi na zole, mutindu mu ke tubaka yawu, kana beno ke mona mwana ya kento ya ntwenya ya bamvula nana-, yivwa-, kumi ke kangama pene-pene ya nkooko ya kento, ntangu nyonso, kima mosi ke tambula mbote ve. Beno me mona? Ya—ya kele na kima ke tambula mbote ve, samu ti ya kele na luswaswanu mingi na nsungi ya bawu. Beno lenda banza, nkooko ya kento kele na saki ya ba-candidat kisika mosi, yina yandi lenda tula diboko ya yandi. Mpe mpangi-kento ya ntwenya, meso yayi ya nene kele ya kuzibuka samu na saki ya

bisikwiki. Samu ti, na mutindu nyonso, bawu zolaka kuzwa kima ve ya kuzonzila, kima ve kasi kaka yandi zolaka pelike yandi mpe kubondila yandi. Kasi ya kele mutindu ya kele, mpe beto kele na kyese ti ya kele kaka mutindu yina.

¹⁵ Mpe na yina mu ke sala nsamunu yina, mu salaka yawu kilumbu mosi, na zulu ya malongi ya mwana-dimeme mpe yembe. Beno me mona, bawu kele na bima na mutindu nyonso. Bawu lendaka zonzila na bima.

¹⁶ Ba- Franc Maçon, Loge ya ba-Franc-maçon, ba ke na bima ya kuzonzila, bampangi ya loge ya ba-Franc-Maçon; bampangi ya Loge ya Bantu ya Ngitukulu. ba-Allemand ke vwandaka na bima, ya kuzonzila, samu na Allemand, samu na yina me yinzo ya beno mosi, ntangu ba-Allemand ke kutana na mosi na yankaka awa, mosi me katuka kaka na yinzo. Ya kele na bima ya kuzonzila.

¹⁷ Mpe Baklisto kele na bima ya kuzonzila. Ya kele samu na yina beto ke vukanaka na bisika mutindu yayi, na bisika ya Mazulu na kati ya Klisto Yesu, samu beto kele bisi-ntoto ya Yinsi mosi. Beto kele bizieti mpe banzenza awa, na yinza yayi. Na yina beto ke zolaka kuvukana kintwadi na basuka yayi ya saba mpe bantangu ya balukutakanu ya bisambu, samu na kuvukana beto mosi kintwadi, samu ti beto kele na bima na mutindu nyonso. Beto ke zolaka kuzonzila bima kintwadi, bima na kimvuka, yina beto ke zolaka: Mfumu, bisalu ya Yandi. Muntu mosi, na kati ya ntima ya bawu, ke pela na kima mosi, Mfumu belusaka bawu, mpe ke zola kaka kutalisa bawu mosi kuna, “Tala yina Mfumu me sala!” Muntu mosi kuzwaka lusakumunu ya nene, mpe zola kaka kukwenda na dibuundu, samu na kubundana na balusakumunu yayi na muntu yankaka. Beno me mona, ya kele samu na yina beto kele na bima na mutindu nyonso.

¹⁸ Ya ke monana na munu ti bamuningu kele mbote mingi na kati ya dibuundu, na suka yayi. Ya ke monana na munu. Mu ke kwikila ve. Ya kele na makelele ya mutindu yayi awa.

¹⁹ Kasi mu kele na kyese mingi na bandandu ya reveil ya lumingu me luta. Beno me mona? Ya me pesa kaka ve kuningana mosi, kasi bisika nyonso, bayinsi yankaka, beto me kuwaka na yawu, ti Mfumu vwandaka mbote. Ntangu yayi, kana kaka kuyoka bakiamvu ya ntama, kusungika bima, mpe kukota kati na Mfumu, kukubama samu na kuzwa balusakumunu; kana mwa ntangu yina salaka yawu, yinki ya zolaka vwanda kana beto landila? Beno me mona? Na yawu, beto bika yawu kufwa ve. Kaka kulandila kutiamuna na zulu ya bisadilu ya kulutula, ntangu nionso, tii bidimbu ya mulinga ke monana kuna na mazulu, ti Yesu Klisto ke zinga, mpe ya kele na tiya ke na kupela na kati ya bantima ya beto.

²⁰ Na manima mu me sala mbiekolo ya malu-malu, munu mosi, mpe kento ya munu, mpe nionso yina, beto me mona bima ya

kuswaswana mingi pene-pene na yinzo. Mpe ya vwandaka ve na kidi-kidi mutindu beto vwandaka, ya kuningana mpe ya kutokisa, “Beto ke kuzwa *yayi* ve, mpe beto ke kuzwa *yawu* ve.” Beto ke kwenda kaka na yawu na pima nionso, mpe beto ke sala diaka ve.

²¹ Na yawu, ntangu yayi, ya kele na mvula ke kwisa ya malu-malu. Mpe beto ke kwikilaka ve na kubalula ba-page ya malu-malu, beto ke kwikilaka kaka na kuyokama ya matiti ya ntama. Na yawu beno vwanda kaka ya kukipesa beno mosi na Nzambi na kati ya mvula ke kwiza, beto zaba ve yina Mfumu ke sala samu na beto.

²² Kasi beto ke vutula matondo samu na mosi na mosi ya beno. Mu ke vutula matondo mingi na Nzambi samu na konso mambele ya Nzutu ya Klisto, bisika nionso. Mpe na kati ya bitezo nionso ya kuswaswana ya balukwikilu, ata ti wapi mutindu bawu fwana wisana ve na munu, mu ke vutula kaka matondo ti muntu mosi. . . Ata mpe kana mu ke banza ti ba ke vwanda fioti na kifu, na kati ya Masonuku, kasi ntete mu ke meka na kutelama kieleka samu na yina bawu ke kwikilaka. Mu me kubama kieleka na kusimbisa bampangi yayi, mpe bayayi ke simbisaka munu na kati ya bifu ya munu mpe bima, samu ti ya kele ve na mosi ya beto ya kulunga.

²³ Kasi na Nsangu nkokila yankaka yina, ntangu mu zonzilaka Nzambi Yandi mosi kukikabulaka na Pentecote, na kati-kati ya ntangu, to na lukutakanu kisika ya zolaka vwanda na lukanu ya kubaka, “Wapi mutindu ya Dibuundu yayi ke vwanda Dibuundu ya malu-malu?” Ya kele samu na yina lukutakanu me salama. Mpe beto ke mona ti na Buku ya ba-Actes, kapu 2, beto ke mona mutindu ya Dibuundu yina ba bakaka lukanu; yinki kifwanukusu ya Dibuundu, yinki Dibuundu ke vwanda, yinki dibuundu ke sala ntangu yawu me yamba Klisto. Mu zola yawu. Mpe mu ke na kunwana samu na Dibuundu yina ba tulaka ntete na Kilumbu ya Pentecote. Ntangu yayi, Yawu vwandaka ngitukulu na ntangu yina, Yawu kele ngitukulu ntangu yayi. Mpe Yawu ke sala yawu, ntangu nionso disumu kele na ntoto, mpe bitumba ke vwanda ya ngitukulu, yawu ke vwanda ya ngitukulu samu na bambeni ya beto, kasi ya kele dyaka bima ya ntalu ya Nzambi yina beto ke na kunwanina na kukwikama ti Nzambi ke sala samu na beto.

²⁴ Ntangu yayi, mazabusu, mu banza ti Mpangi Neville me sala yawu dezia.

²⁵ Mpe kuvwanda na yinzo samu na lumingu yayi, samu na kusambila mpe samu na kusosa kizizi ya Mfumu. Na yina, na mvula yayi ke kwisa, na lusalusu ya Nzambi, kana Yandi ke sadisa munu kaka, Mu zola kupusa bitumba ngolo mingi kulutila mu me salaka ntete na luzingu ya munu nionso. Mpe mu banza ti diambu ya nene ya mvula yayi ke luta na bilanga ya nzenza,

mpe Haiti, mpe na bisanga, mpe na Amerika ya Sude, mpe na Afrika, mpe na Asie, mpe Inde, mpe—mpe kuna na Scandinave. Mpe bayina nionso fwana baka lukanu sabala yayi, kana Mfumu ke pesa muswa. Na yina ntangu mu ke kuwa lutwadusu ya kusala kima mosi to kukwenda kisika mosi, Mfumu me tinda munu na kusala mutindu yina.

²⁶ Kuna ntangu mu basikaka na avion, na zulu ya ntoto, mpe ya ke monana mutindu awa me kwisa mosi, mpe yandi tubaka, “Oh, denomination *yayi* kubwaka, yayi salaka *yayi*, to *yayi* kwendaka yimbi, to beto lendaka sala *yayi* ve, to lutumu me tuba ti beto lenda vwanda ve na lukutakanu.”

²⁷ Na yina mu zola kutelama, “Kasi mu me kwiza na Nkumbu ya Mfumu.” Mpe mu zaba ti ya kele dyabulu, kuna. Beno me mona, ya kele ve, “Mu salaka foti?” Mu kele ya kutwadisa. Na yina beno lenda telama na mapeka ya beno na volant, mpe kulandila bitumba.

²⁸ Ntangu yayi, ntete beto zibula Buku, to samu na kulomba Nzambi na kuzibula Yawu mutindu beto ke tanga Yawu, Mu ke zola kutuba samu na yinki mu ke nata Nsangu yayi na dibuundu na suka yayi. Ya kele Nsangu ya munu ya Nowele na dibuundu. Ya kele . . . kana Mpeve-Santu ke sadisa munu na kupesa yina mu ke kwikila samu na yawu. Ntangu yayi, ata mutindu mbote ya kele ya kusunama na kati ya Masonuku, mpe ata mutindu muntu ke bakula yawu, bawu fwana tala dyaka na Mpeve-Santu samu na kupesa yawu na bantu. Mpe ya kele kaka na manima ya Nowele, ntangu beno me kuwaka masolo nyonso ya Nowele mpe nsamununu, mpe nyonso yankaka, ya bansangu ya Nowele. Yayi ke vwanda mwa muntu mosi, samu na disolo ya Nowele, kasi dyaka Nzambi tulaka yawu na zulu ya ntima ya munu.

²⁹ Mpe ntangu yayi beto kulumusa bayintu ya beto na mwa ntangu fioti, na Mvwandulu ya Yandi mpe bivudi ya ludedomo ya Yandi, samu na kulomba kyadi.

³⁰ O Nzambi, Mvulusi ya beto ya kusakumuka mpe Tata, beto ke belama na kiti ya Nge ya kimfumu ya kyadi. Na Nkumbu ya Mfumu Yesu, Mwana ya Nge, beto kele ya kukikulumusa na kukikulumusa nionso na suka yayi, samu na kupesa na Nge bisambu ya beto mpe kuvutula matondo ya beto, samu na bayina nionso Nge salaka samu na beto. Na sabala yayi me luta, mingi-mingi, mutindu bantima yina kele na nzala ya nene, mpe bantu me manga kudya, mpe Mpeve-Santu me sakumuna bawu, me sala bima ya nene na kati-kati ya beto! Bambevo me beluka. Mpe Nzambi me zabana, ti Yandi ke zinga, mpe Yandi ke zolaka bantu ya Yandi.

³¹ Mpe ti Bandinga kele kaka kieleka, ya profete, ntangu yandi tubaka Bandinga ya Mfumu Nzambi, ntangu yandi tubaka, “Kana bantu yina ba me bokila na Nkumbu ya Munu ke vukana kintwadi, mpe ke sambila, na yina mu ke kuwa katuka na

Mazulu.” Bandinga yango kele kaka kieleka mutindu kilumbu ba zonzaka ntete. Beto talaka yawu, Mfumu. Ntangu yayi lemvokila beto, beto ke sambila, na masumu ya beto nionso, kukondwa lukwikilu ya beto nionso, yina kele disumu.

³² Mpe beto ke sambila, Mfumu, ti Nge ke vutula na beto lukwikilu yina mbala mosi ningisaka Dibuundu yina ya ntete. Ve kulomba mbeto ya bafololo ya kitoko, kasi kulomba kaka kyadi ya Nzambi, mpe samu na Mvwandulu ya Yandi, mpe balusakumunu ya Yandi na kukwenda na beto. Ata ti ya ke vwanda na kati ya kilanga yayi to kilanga mosi na bayinsi ya nzenza, ata ti ya kele na zulu ya bumvwama, to bambeto ya kitoko, to ata ya kele na ndilu ya bitumba, ata kisika ya lendaka vwanda, Mfumu, luzolo ya Nge ya kulutila fioti kele nsatu ya beto ya nene samu na kusadila Nge. Kumisa kaka yawu pwelele na beto, O Mfumu, ti beto ke kondwa ve nzila, samu ti beto ke tambula na yinza ya mpimpa mpe ya kufwa meso, na kati-kati ya bantu ya masumu ya kufwa meso. Na yawu, pwelele nzila ya beto, Tata, mpe twadisa beto mutindu Nge zola, mameme ya kilanga ya Nge.

³³ Ti Muvungi ya mameme na lembami mpe ya kukikumumusa kutwadisa bantu ya Yandi, mutindu beto ke vingila na Nge na suka yayi samu na Nsangu ya suka. Bika ti Mpeve-Santu kutuba pwelele na konso ntima mpe bika beto simba dibanza ya yina profete vwandaka tubila, mpe na yina, na yina, kele na balusakumunu ya nkembo ya Mvwandulu ya Nzambi, samu na kusiamisa Ndinga nionso. Beto ke lomba yawu na Nkumbu ya Yesu, Mwana ya Nge, Mvulusi ya beto. Amen.

³⁴ Mu ke yufula bantu ya beto na suka yayi, bayina na ba-Biblia, kana bawu zola kutanga na munu, Masonuku, to kulanda munu mutindu mu ke tanga, kana beno baka Buku ya Esaie. Profete Esaie, mpe kapu 7, mu ke zola kutanga na kitini ya Masonuku yayi. Na Esaie, kapu 7, beto ke banda na disolo ya Nzambi na Achaz, na nzila ya 10.

Na yina MFUMU tubaka dyaka na Achaz, na kutubaka,

Lomba kidimbu ya MFUMU Nzambi ya nge; lomba yawu to na kibumbulu, to na zulu.

Kasi Achaz tubaka, mu ke yufula ve, to dyaka mu ke meka MFUMU.

Mpe yandi tubaka, Beno kuwa . . . O yinzo ya David; Ya kele kima ya fyoti samu na beno na kulemba, kasi beno ke lemba Nzambi ya munu mpe?

Na yawu Mfumu yandi mosi ke pesa beno kidimbu; Tala, mwense mosi ke kuzwa kivumu, mpe ke buta mwana ya bakala, mpe . . . ba ke bokila nkumbu ya yandi Emmanuel.

Mafuta mpe mafuta ya niosi yandi ke kudia, yina yandi lenda zaba na kumanga. . . yimbi, mpe kusoo- . . . kusoola. . . mbote.

Samu ti ntete mwana kuzaba kumanga. . . yimbi, to kusoola. . . mbote, yinsi yina nge ke manga bantinu bawu zole. . . ke bika yawu.

35 Kana mu lendaka tuba dilongi mosi na yayi, samu na kubasisa dibanza mosi, mu ke zola kusadila ndinga: *Kidimbu Ya Kulutula*.

36 Ntangu beto ke na mpimpa ya mudidi mingi, mpe ya ke monana ti na. . . bantangu yankaka ya kele mpimpa mingi na nkokila yayi ti beto lenda mona ve maboko ya beto na ntwala ya beto, ya kele na ntangu yina ti nsemo ya kutengama ke semaka kulutula mingi. Ba me fidisa yawu na beto samu na kulakisa ti ya lenda vwanda na nsemo na mpimpa.

37 Yayi vwandaka na ntangu ya kimfumu ya Achaz, ntinu ya yimbi. Mpe kana beno tala, Mfumu tubaka ata mbala mosi ve nsangu na Achaz, kasi na yinzo ya David. “Kuwa, O yinzo ya David! Yayi ke vwanda kidimbu.” Samu, bawu vwandaka na kati ya mvita, bampangi ke nwanisa bampangi, mpe ya monanaka mutindu ti ya vwandaka ngunga ya mudidi ya banzietolo ya Israel mpe ntangu ya bawu ya nzietolo. Kasi Nzambi bulaka ngolo, na nzila ya profete, kidimbu ya Seko. Ntangu yayi, bidimbu kele bambala mingi. . .

38 Bantu kele na bidimbu. Mpe beto ke zinga na yinza ya kifuluka na bidimbu. Muntu me meka na kusala kidimbu mosi. Muntu me meka, na nzila ya kusosa-sosa ya yandi ya science, na nzila ya nsalulu ya yandi mosi, samu na kusala kidimbu yina ke vwanda ya kuswaswana, to lubambuku ya mayele ya yandi, mutindu nene yandi kele, to wapi mutindu ya dibanza ya nene yandi kele. Yandi salaka yina kuna na kati ya bamvula.

39 Mumbandu, ntangu mayele ya yinza, na yisi ya bamvula nkama mosi me luta, bakaka lukanu ti bawu vwandaka na mayele mingi ti bawu lendaka pesa na yinza kidimbu ya mayele ya bawu, ti bawu lendaka tunga bawu mosi bwatu ti ya ke vwanda ve na kiteμπο ya nene mingi ke dindisa yawu. Mpe bawu bokilaka bwatu yayi Titanic. Ya vwandaka lubambuku ya nsuka samu na yinza, nsalulu yina ya nene ya lutungu ya babwatu kumaka na kisika ya kulunga, ti bawu lendaka talisa na yinza ti bwatu yandi lendaka ve kudinda.

40 Na yina, na lukengolo nionso na zulu ya mayele ya bitungi, mpe nzonzolo ya bawu mpe masolo, mpe bansiamisa ya science ti bwatu yayi lendaka ve kudinda! Na yina ntangu bima ke talisama na bantu mutindu yina, ba—ba ke banza na kusala kivuvu ti bima nionso kele mbote mingi, ntangu nyonso yina kusosa-sosa ya science ke tuba ti ya kele mbote.

41 Na yina ba vwandaka sabuka nzadi ya nene na kati ya bwatu yayi, na nzietolo ya yawu, mpe banzaka ti ba vwandaka na lukengolo ti kima mosi ve lendaka sala bawu yimbi, bawu kuzwaka feti ya nene ya kukola malafu. Mpe bakento nionso mpe babakala na kati, to, mu banza mingi na kati ya bawu, mu fwana tuba, lawukaka malafu; ata mpe, bawu ke tuba, mpe pilote mpe kapitene, mpe bawu nionso. Mpe bimvuka bandaka na kuyimba miziki ya jazz, yina vwandaka mode ya nene ya kilumbu yina, mutindu beto ke na rock-and-roll bubu yayi. Samu, bawu vwandaka na lukengolo, bawu vwandaka na masuwa yina bantu pesaka yinza kidimbu ya mayele ya bawu, ti, “Masuwa yayi lendaka ningisa konso mubu to konso mubu.”

42 Na yina bawu vwandaka na kati ya kulawuka ya feti yayi, yawu kwendaka na kati ya lubungi. Mpe mosi ya ba-kapitene tubaka, ti, “Beto fwana tala ba-moteur.” Kasi lutumu ya nene tubaka, “Pesa yandi, ‘Kaka na ntuala!’ Beto fwana vwanda na mwelo samu na mbokolo mosi.” Na yina yandi vwandaka kotisa na kati ya lubungi, mutindu ya vwandaka mfumu ya diambu, kaka na kintulumukina, yawu tutaka ditadi ya galasi, mpe dindaka na yisi ya masa.

43 Mpe ba me tuba na beto na nzila ya poète yina sonikaka nkunga, “Nzambi, na diboko ya Yandi ya ngolo, ke lakisa yinza yayi ya lenda simba ve.”

44 Kisalu ya bawu ya nene kwendaka na yisi ya mubu, na bankama na bankama ya bantu ya kulawuka malafu kuna na kati. Ya ke simba kaka ve.

45 Ya vwandaka Adolf Hitler ya ntama yina pesaka na bantu ya Allemagne kidimbu ti yandi vwandaka muntu ya kulutila mayele, yandi zabaka nionso yina me tala luzingu ya basoda. Mpe, kukondwa kuseka yandi, yandi zabaka mingi samu na yawu. Kasi yandi pesaka muswa na bantu ya Allemagne, na kutunga yina beto ke bokilaka Nzila ya Maginot, to Ndilulu ya Siegfried, ti yandi tiamunaka bakyasa ya ba-tonne ya béton mpe acier kintwadi. Yandi talisaka kivuvu ya yandi na yawu, ti yandi zangulaka quartier général ya yandi tii na ntuala, kisika ba-restaurant mpe bisika ya mumbongo vwandaka sala na yisi ya ntoto, kisika ba kuzwaka bakyasa ya ba-tonnes ya acier mpe ciment kintwadi. Ata mutindu ya kwendaka, Allemagne vwandaka na kikesa. Ya vwandaka kidimbu ya lukengolo. Kasi kimvuka ya bilumbu yayi bulaka yawu na Seko, mpe Hitler na yawu.

46 Ya vwandaka Nimrod, kilumbu mosi, yina tubaka ti yandi ke tunga yinzo-zulu yina ke nata bantu ya yandi, yandi lendaka lakisa yina yandi lendaka sala na nzila ya mayele ya yandi. Mpe yandi zolaka tunga yinzo-zulu yina zolaka kwenda na zulu ya matuti, ti, kana nganzi ya Nzambi kukwiza, yandi zolaka luta Yandi na mayele. Na kusosa-sosa ya yandi ya science, yandi

lendaka tula matadi mpe matadi na mutindu ti yandi lendaka nata bantu na lukengolo, na mayele ya yandi. Kasi yawu kumaka putulu, na nzila ya muvusu ya bandinga, mpe bawu lendaka ata fioti ve kumanisa yinzo-zulu.

⁴⁷ Ya vwandaka Nebucadnetsar yina tungaka bibaka ya Babylone, mpe na manima yawu ninganaka. Ya nene mingi, ti, bayintu sambanu ya bampunda mpe bapusu-pusu lendaka kwenda mbangu na bibaka. Mielo ya yawu vwandaka nene mingi, tii babakala tokaka luzingu ya bawu nionso, na kubulaka kisengo na bankotolo yina bankama ya ba-tonne; na kati ya mbanza ya nene, bawu bakaka bakompani ya bantu samu na kuzibula yawu. Muntu ve zolaka simba Nebucadnetsar. Kasi nkokila mosi, na kati ya buzoba ya kulawuka malafu, na kubanzaka ti bawu vwandaka na lukengolo na manima ya bibaka ya bawu ya science, na bambele ya kilumbu ya bawu, kuna me kwiza Diboko mosi na zulu ya kibaka. Mpe yawu sukaka.

⁴⁸ Oh, wapi mutindu muntu me meka na kunata muntu na lukengolo, samu na kupusa yandi mosi na lukengolo, na nzila ya bidimbu ya yandi mosi ya kosalu. Ya ke monana mutindu, samu ti bantu ke sosa kidimbu, ya fwana vwanda na lukanu mosi samu na yawu; kima mosi na kati ya muntu yina ke bokila lukanu mosi to kidimbu mosi, kisika mosi kuna, ti yandi lendaka vwanda na lukengolo.

⁴⁹ Na yina Nzambi tubaka, yandi tubaka, “Mu ke pesa bawu kidimbu ya kukonda nsuka. Mu ke pesa Dibuundu kidimbu ya kukonda nsuka.” Ya zolaka vwanda ve kibaka ya nene to yinzo-zulu. Yandi tubaka, “Mwense mosi ke kuzwa kivumu, mpe ke buta Mwana, mpe ke bokila Nkumbu ya Yandi ‘Emmanuel.’ Yina ke vwanda kidimbu ya Kukonda nsuka ya Nzambi.” Wapi mutindu ya kukikulumus! Wapi mutindu ya fioti!

⁵⁰ Beno me bakula ti ya kele mwa bima yina beno ke luta mpe ke zimbana, yina zola kutuba mingi na Nzambi? Dibuundu lenda kuzwa kivumu na suka yayi? Na nsalulu ya beto mutindu organisation, mpe bivinga ya yandi ya nene mpe bima ya kulunga, beto ke na kuzimbanaka mwa bima yina zola kutuba mingi na Nzambi mpe mingi tii na kisika ya beto ya nsuka ya Seko. Beto me zimbanaka bima yayi.

⁵¹ Nzambi tubaka, ti, “Mu ke pesa nge kidimbu ya Kukonda nsuka. Mwense mosi ke kuzwa kivumu, mpe ke buta bébé.”

⁵² Samu na yinki, samu na yinki bébé, samu na yinki yandi lendaka vwanda bébé? Mvangi Yandi mosi fwana kwiza mpe kuzinga na ngidikulu ya Yandi, samu na kuvwanda kidimbu samu na muntu? Samu na yinki ya zolaka vwanda bébé? Samu na yinki Yandi tubaka ve, “Mu ke tunga kikalu ya nene, mpe beno nionso... mutindu ndosi ya Jacob. To, mu ke katuka na Mazulu, na ba-couloir ya Mazulu, nsinga, mpe mu ke pesa nge

ngolo, ti, ntangu beno ke kangama beno mosi na kati ya yawu, mu ke zangula beno”?

⁵³ Kasi, Yandi kwisaka ya kukikulumusa mingi. Mpe yandi tubaka, “Bébé ke butuka. Yina ke vwanda kidimbu. Ya ke vwanda kaka kidimbu ve, kasi ya ke vwanda kidimbu ya kulutila.” Bébé! Na yina, mayele ya science lendaka seka na ntwala ya dibanza ya mutindu yina. Kasi, na Nzambi, ya vwandaka kidimbu ya kulutila. “Mwense mosi ke kuzwa kivumu, mpe ba ke bokila bébé yayi *Emmanuel*, yina na nzila ya lutendulu ke vwanda, ‘Nzambi na beto.’” Yina kele kidimbu ya kulutila.

⁵⁴ Nzambi ya Mazulu, ke zinga na bantu, kele kidimbu ya kulutila. Ya ke vwanda kaka kidimbu ve samu na kilumbu yina, kasi samu na kilumbu yayi mpe bilumbu nionso, ti Nzambi ke zinga na bantu ya Yandi. *Emmanuel*, Nzambi na beto, yayi kele kidimbu ya nene. Yayi kele kidimbu ya Kukonda nsuka, kidimbu ya kukonda nsuka, Nzambi pesaka.

⁵⁵ Mpe samu na yinki Yandi kumaka fundu-fundu, fundu-fundu ya luvangulu ya Yandi Mosi? Mvangi kumaka yawu, fundu-fundu ya luvangulu ya Yandi.

⁵⁶ Muntu vwandaka meka na kusala kima ya nene. Kasi, ntangu Nzambi pesaka kidimbu, ya vwandaka mwa kima mosi. Muntu ke meka na kusala mambu ya nene. Nzambi ke salaka na mwa diambu ya fioti. Muntu ke meka na kutuba, “Samu ti muntu nyonso ke kwenda mutindu *yayi*, beto sala mutindu bawu ke salaka na Hollywood.” Nzambi zola lutangu ya fyoti. Yandi zola ku—kubika bima nyonso ya nene, samu na kuzwa fyoti yina.

⁵⁷ “Bébé ke butuka, mwa *Emmanuel* ke butuka.” Nzambi ya luvangulu me kuma kitini ya kivangu ya Yandi Mosi. Nzambi, Kiyidiki ya Mazulu mpe ntoto, Yina salaka fundu-fundu mpe bayinti, mpe bima nyonso yina kele, kukuma kitini ya yawu. Yina ke vwanda kidimbu, Yandi ke luta na nzila ya muntu.

⁵⁸ Ntangu yayi, Yandi zolaka kwiza mutindu yankaka. Yandi zolaka kwiza na nzila ya yankaka, ya—ya mitindu yankaka yina Yandi fwana kwiza.

⁵⁹ Kasi Yandi soolaka na kukwiza mutindu yayi, samu na kupesa kidimbu, kidimbu ya kulutila. “Mwense mosi ke kuzwa kivumu, mpe ke buta Mwana, mpe ba ke bokila Yandi ‘*Emmanuel*.’” Ntangu yayi, samu na yinki? Samu na yinki?

⁶⁰ Samu na yinki Yandi soolaka ve na kukuma Wanzio? Yandi zolaka sala yawu. Yandi zolaka kwiza muntu ya kufuluka na bantu ya kukula. Yandi zolaka kuma na mbote ya kufuluka yina me katuka na Mazulu, na Bawanzio mpe Bantu nyonso ya Mazulu; ya kulala na ba-couloir ya Mazulu, na kikalu ya wolo, mpe Yandi zolaka mata kuna na kimvuka ya Wanzio. Yandi zolaka sala yawu.

61 Kasi Yandi tubaka, “Mu ke pesa nge kidimbu, kidimbu ya kulutila, kidimbu ya kukonda nsuka. Mwense mosi ke kuzwa kivumu, mpe ke buta mwana.”

62 Mpe ntangu Yandi zolaka sola kisika yina mwana yayi zolaka butuka. Yandi zolaka kulumuka na kikalu, na Mazulu nyonso ya kufuluka. Yandi zolaka kulumuka na Mazulu mutindu Wanzio, to kukulumuka mutindu muntu ya muvimba ya kukula. Kasi Yandi, mpe, zolaka kwiza na yinzo ya ntinu.

63 Kasi Yandi tubaka, “Mu ke pesa kidimbu.” Mpe kidimbu tubamaka na mivungi, “Beno ke mona Yandi na kati ya kidikilu, ya kufuka na bilele.” Yina kele kidimbu ya kulutila, yina me butuka na zulu ya kikunku ya matufi ya bibulu, mpe nsunga ya dibaya ya yinzo, kukondwa bilele ya kutula na zulu ya Yandi, Emmanuel. Diabulu ke zolaka kusala bima ya nene mingi mpe kusema. Nzambi ke bumbaka bima ya kukikulumusya. Kidimbu ya kulutila, “Beno ke mona Bébé ya kuinga na kati ya bilele, ya kulala na kati ya kidikilu. Yayi ke vwanda kidimbu, kidimbu ya kulutila.” Ntangu Yandi vwandaka na zulu ya ntoto, Yandi vwandaka mputu mingi. Wapi mutindu beto ke tubila ntangu ya mpasi? Nani kele Muntu yayi ya fioti? Ya kele Yehowa!

64 Yehowa Nzambi kumaka muntu, bakaka kinkuku na zulu ya beto, zabukaka Yandi mosi na Nzambi, mpe kumaka muntu. Beno tala kidimbu. Kumaka. . . Yandi vwandaka Nzambi, mpe kumaka muntu; muntu ya mwama ve, kasi muntu ya mputu. Yayi kele kidimbu ya nene. “Nge me lomba kidimbu,” Nzambi tubaka, “Mu ke pesa nge mosi, kidimbu ya kukonda nsuka.”

65 Yandi zolaka kwiza mutindu yankaka, mutindu mu tubaka, kasi, bébé, samu na yinki Yandi kumaka bébé? Ntangu mwa yinwa yina ya ntete, ya kukondwa meno zibukaka na kati ya kidikilu yina, na zulu ya berceau yina ya ntete. . . na suka ya ntete ya Nowel, na kati ya mwa kidikilu ya Yandi, mpe mwa makelele yina katukaka na ndinga ya Yandi, yina vwandaka Nzambi ke boka. Yehowa ke dila, muntu; me katuka na Nzambi, mpe vwandaka muntu, konso mpeve, muntu. Yandi kwizaka na yinza na kima mosi ve, kasi kaka muntu. Yinki Yandi vwandaka meka na kusala? Yinki Yandi vwandaka balukanu?

66 Yandi bokaka mutindu bébé, na kidikilu. Yandi bulaka mutindu mwana-bakala, na bala-bala. Yandi salaka mutindu muntu, kasi dyaka Yandi vwandaka Emmanuel. Yayi kele kidimbu ya kulutila. Nzambi ke na kuzingaka na kati ya ngidikulu yina Yandi vangaka. Kidimbu ya kulutila, “Ya ke vwanda kidimbu samu na nge.”

67 Yandi vwandaka mputu mingi, ntangu Yandi kwisaka na ntoto, Yandi lutaka na kati ya kivumu ya kudefa, kivumu ya kudefa ya kento mosi. Mpe zolaka kudefa ntoni, samu ba zika yandi. Nzambi! “Mwense mosi ke kuzwa kivumu, kukondwa kuvukisa banzutu.” Yehowa defaka kivumu ya Marie, kento,

samu na kusala kisalu yina Yandi zolaka pesa kidimbu ya kukonda nsuka. Mpe vwandaka mputu mingi, na zulu ya ntoto, na manima ya bamvula makumi tatu na tatu na ndambu, ya ministele, Yandi zolaka kudefa ntoni samu ba zika yandi. Beno lenda banza? Beno zonzila na dibanza ya kulunga, yinki nge zola kutuba, na mutindu nyonso?

⁶⁸ Beno lenda ve kumona kidimbu ya kieleka? Ya kele Yehowa kukuma mosi ya beto. Yehowa Nzambi na zulu ya ntoto, mutindu muntu ya boma, kizieti na yinsi yina Yandi vangaka; ba losaka Yandi, mpe ba pusaka Yandi, mpe ba sekaka Yandi, ba sawulaka Yandi; Ditadi ya disakuba samu na muntu ya kukondwa lukwikilu, Ditadi ya kututisa; diabulu, samu na yinza ya misambidi. Kasi kidimbu ya Seko samu na mukwikidi, “Nzambi na beto,” kidimbu ya kulutila. Beno me mona yawu? Nzambi me monisama, Nzambi ke kukitalisa Yandi mosi na yinza, mutindu muntu ke tina. Zolaka kwiza mutindu yankaka, kasi solaka na kukwiza mutindu yayi.

Beno kuwa Yayi. Beno kondwa Yawu ve.

⁶⁹ Mu banza ti Nzambi vwandaka na yawu na mabanza ya Yandi, ya ke lomba na muntu. Ya kele, samu na mukwikidi. Ya ke lomba ntangu Nzambi ya beto ke kuma mosi ya beto. Kasi, na mutindu ya nganda, ya kukondwa busantu, ditadi ya disakuba. “Mu ke pesa nge kidimbu, mwense mosi ke kuzwa kivumu. Emmanuel ke vwanda na nge.” Nzambi banzaka ti ya ke lomba na bantu, ti Nzambi ya beto ke vwanda mosi ya beto, ti Yandi ke sabuka Yandi mosi mpe ke kuma fundu-fundu ya beto, ti Yandi ke kuma kinkuku ya beto, kinkuku ya bantu; Mvangi Yina salaka bima nionso.

Mpe, diaka, yawu lungisaka profesi. Baprofete monaka yawu.

⁷⁰ Mpe kima yankaka, “Ndinga kumaka putulu, nsuni, mpe zingaka na kati-kati ya beto.” Yehowa, Ndinga kumaka muntu, kumaka fundu-fundu mpe zingaka na beto. Kidimbu ya *Kukonda nsuka*, “ke suka ata fioti ve.” Oh, ntangu beto ke banza na yawu, kidimbu ya Seko, bidimbu ya kulutila ya bidimbu nyonso, Nzambi ke kuma mosi ya beto.

⁷¹ Na yina, diaka, Yandi fwana vwanda Nkuna ya Abraham. Abraham, ya kieleka, vwandaka nkuna ya Eve. Eve. . . “Vwandaka Nkuna ya kento yina zolaka kudyata yintu ya nyoka.” Kasi, Abraham, kana beno lenda simba yawu, yandi vwandaka na lukwikilu na Nzambi, yina vukisaka Mpeve ya Nzambi na nzutu ya muntu. Ya kele kisika lukwikilu ke kwizaka. Ya kele samu na yina Yandi zolaka vwanda Nkuna ya Abraham, nsuni nyonso ve, kasi kuvukana ya Mpeve mpe nsuni kintwadi. Nzambi, me kuma Yandi mosi. . . ke na kudila, ke na kuzimbisa yimbi nionso, ke na kuyalaka nzutu, fundu-fundu yina Yandi vangaka, mpe ke zinga na beno mutindu dyambu.

⁷² Kima yankaka, Yandi teleminaka ata mbala mosi ve to teleminaka ata mbala mosi ve misiku ya Yandi. Yandi lenda sala yawu ve. Na yawu, “Mwense. Mu ke pesa nge kidimbu.” Ya kele ve Titanic, ONU ve, kasi, “Mu ke pesa nge kidimbu ya nkebolo. Mwense mosi ke kuzwa kivumu, mpe yandi ke buta Mwana, mpe ke bokila Yandi ‘Emmanuel.’” Yina kele kidimbu. Yinga.

⁷³ Beno me mona, na misiku ya Nzambi ya mpulusu, mutindu ya vwandaka na Boaz mpe Naomi, ya zolaka vwanza mpangi ya pene-pene. Mpe mutindu kaka yina muntu zolaka kuzwa mpulusu, Nzambi zolaka kuma tata, ya pene-pene. Mu zola beno kumona yawu. Yandi kumaka ata mbala mosi ve mpangi, na nyonso, na mvwama, na ngolo. Kasi Yandi butukaka na kati ya kidikilu, ya kufuka na bilele; ve samu na kuluntu, kasi samu na mwana. Yandi vwanza Nzambi na zulu ya luvangulu. Yandi soolaka na kusala yawu, yandi kwisaka ve muntu ya kukula. Yandi kwisaka ti Yandi fwana tala mpasi ya bansatu ya ba-bébé ya fioti. Yandi kwisaka ti Yandi fwana luta na kati ya bampukumuni ya buntwenya. Lendaka kwenda, ti Yandi lendaka sala bampasi mpe mitambu ya diabulu, mutindu muntu, mpe kusala nzila samu na bantu ya bansungi nionso, ya bansungi nionso mpe bakalasi nionso: mputu, mvwama, nionso. Yandi kumaka mputu, ti, na nzila ya bumputu ya Yandi, beto lendaka kuma mvwama mpe bibyadi na Yandi na kati ya Kimfumu. Kidimbu zolaka pesama, kusabuka Yandi mosi, na kusalaka Yandi mosi kima ya kuswaswana na yina Yandi vwanza; ntangu yayi kidimbu ya kulutula, ke dila mutindu bébé, ke sakana mutindu mwana-bakala, samu na kutambula mutindu muntu, kasi ya vwanza Nzambi yina vwanza zinga bitezo nionso ya luzingu mutindu beto ke salaka.

⁷⁴ Beno zaba, Nzambi me pesa bidimbu mingi ti Yandi vwanza Nzambi. Yandi pesaka kidimbu na yinza ya kufuluka na maza, ti Yandi vwanza Nzambi, Nzambi ya lufundusu. Yandi losaka bantu na bilumbu ya Noé, mpe nataka bantu ya kudedama na kati ya nzaza; kidimbu ti Yandi vwanza kaka, mpe lufundusu vwanza kieleka. Ya kele kidimbu, ti konso musumuki yina balulaka ntima ke kufwa ve na lufundusu, ti bantu ya kudedama ke kuzwa mpulusu na nzila ya kyadi ya Nzambi.

⁷⁵ Yandi pesaka yankaka kidimbu na mulaka ya tiya. Yinki ya vwanza ntangu Yandi kangaka profete ya Yandi yina vwanza tina, “Mu me kuwa kudila ya bantu ya Munu, mpe mu me bambuka moyo na ngwisani ya Munu?” Yandi pesaka kidimbu yankaka kuna, ti Yandi vwanza Nzambi yina ke zitisaka ngwisani, ti Yandi bambukaka moyo na nyonso yina Yandi tubaka, konso nsilulu yina Yandi salaka. Pesaka kidimbu na mulaka ya tiya, “Mpe mu me kulumuka samu na kuvulusa bawu.”

⁷⁶ Beno tala mbote Nzambi na mitindu ya Yandi ya kusalu.

Ntangu Yandi vangaka Mazulu mpe ntoto, Yandi bokilaka Bawanzio kintwadi, mpe Yandi tubaka, “Bika beto.” Kisika nyonso na kati ya Masonuku kisika Yandi salaka kima mosi, na mutindu nyonso, “Munu ve, kasi Tata ya Munu.”

⁷⁷ Kasi ntangu ya kumaka na dikani ya mpulusu, Yandi kwizaka yandi mosi. Muntu mosi ve vwandaka na Yandi. Yandi vwandaka mosi Yina kaka lendaka kwisa. Wanzio lendaka ve kusala yawu. Muntu yankaka, bokilaka mwana ya Yandi ya bakala, lendaka ve kusala yawu. Mosi bokilaka kima yankaka, mwense ya santu, to mama ya santu, to—to santu mosi, lendaka ve kusala yawu. Nzambi zolaka kukwiza! “Mpe mu ke pesa nge kidimbu. Mwense mosi ke kuzwa kivumu; mpe bébé ke butuka, mpe Yandi ke vwanda Emmanuel, Nzambi na beto,” kidimbu ya kulutila. Nzambi na kati ya bantu ya Yandi. Nzambi na bantu ya Yandi. Nzambi kumaka bantu ya Yandi. Nzambi mpe muntu kumaka mosi. Kidimbu! Ditadi ya disakuba samu na yinza, kasi kivuvu ya kusakumuka samu na mukwikidi. Kidimbu yina ba ke zonzila yimbi.

⁷⁸ Yandi vwandaka na ntangu yankaka yina Yandi siamisaka. Yandi siamisaka na kufulukuka ya maza ti Yandi vwandaka Nzambi ya lufundusu, mpe Nzambi ya kyadi na bayina zitisaka Misiku ya Yandi.

⁷⁹ Yandi lakisaka na mulaka ya tiya, na nzila ya kidimbu, ti Yandi zolaka zitisa konso nsilulu yina Yandi salaka.

⁸⁰ Mpe na Mubu ya Mbwaki, Yandi lakisaka ti Yandi ke sala nzila samu na bayina vwandaka meka na kusala mbote mpe kulanda Musiku ya Yandi. Ata nyonso yina ke zenga yawu, Nzambi siamisaka na Mubu ya Mbwaki, mpe pesaka kidimbu, ti Yandi lendaka zibula mubu. Na konso mpukumunu, Yandi ke sala nzila ya kukima. Beno tuba, “Mama ke kwikilaka Yawu ve. Papa ke kwikilaka Yawu ve. Dibuundu ke kwikilaka Yawu ve.” Mu ke kipe ve nani ke kwikila Yawu ve. Kana beno ke kwikila Yawu, Nzambi ke sala nzila ya kukima. Yandi pesaka kidimbu ti Yandi ke sala. Bawu vwandaka na nzila ya bawu, mbala mosi na yinsi ya nsilulu, kisika Nzambi silaka bawu. Mpe Mubu ya Mbwaki kangaka bawu, mpe bawu kotaka na mpsi. Bawu zabaka ve yinki kusala. Nzambi lakisaka ti Yandi ke sala nzila ya kukima na konso mpukumunu, kumekama nyonso. Beno lenda ve kubika kunwa tabaka? Baka Nzambi kilumbu mosi. Beno lenda ve kubika kuvuna, lenda ve kubika kuyiba, lenda ve kubika kudasuka? Baka Nzambi na nge ntangu mosi. Kana beno ke na nsatu ve ya kukwenda na yinzo-Nzambi, mpe beno lenda ve kukuma kisika mosi; beno baka Nzambi na beno mbala mosi, beno baka nsilulu ya Yandi. Yandi siamisaka, na Mubu ya Mbwaki, ti Yandi ke sala nzila ya kukima. Nzambi pesaka bidimbu mingi.

⁸¹ Na nkokila yina ntangu Yandi tubaka na mivungi, “Kwenda

na Bethlehem, samu kilumbu yayi me butuka Klisto Mvulusi. Klisto, Nzambi ya kupakulama, kilumbu yayi me butuka na nzila ya kento.” Nzambi!

⁸² Ve na kusalaka yandi nzambi, ntangu yayi. Yandi defaka kaka kivumu ya kento, mutindu mosi Yandi sumbaka nzutu *yayi* samu na kulonga Nsangu ya mbote. Mutindu mosi Yandi me bweta nzutu ya beno, samu na kusala kosalu yina Yandi zola kusala na nzila ya beno, samu ti Yandi kele kaka Emmanuel, kidimbu, Nzambi na bantu ya Yandi. Nzambi ke zinga na kati ya bantu ya Yandi, kidimbu ya kulutila nene, ya kukonda nsuka. Yawu lenda kubwa ata fioti ve. Yawu ke vwanda ntangu nionso kidimbu.

⁸³ Beno ke zonzila na bidimbu yayi, wapi mutindu samu na yayi? Ntete beno kuzwa kidimbu yankaka, kidimbu ya kuzonza na bandinga, kidimbu ya kupesa profesi, kidimbu ya mazulu, beno fwana vutuka na kidimbu ya ntete, ya Seko mpe kidimbu ya kukonda nsuka. Beno sungama, na kubanda, mpe na zulu ya lufulu yina, yina kele Ditadi na nzila ya bansungi, mpe kima mosi ve ke simba yawu. Mielo ya Difelo ke telemina yawu, kasi ba ke nunga yawu ve. Beno kuzwa kidimbu yina, “Mwense mosi ke kuzwa kivumu, mpe ke buta Mwana.”

⁸⁴ Mpe Yandi tubaka na mivungi yayi, “Tala mutindu nge ke mona Yandi. Yandi ke vwanda na kati ya kidikilu, na kati ya kidikilu, ya kufuka na bilele. Mpe ntangu beno ke tala na zulu ya Yandi, beno kwikila, samu ti Yandi kele Nzambi na kati-kati ya beto.”

⁸⁵ Kidimbu yina vwandaka kaka ve samu na mivungi. Kasi ba pesaka yawu na yinza ya muvimba, samu na kutala Yandi mpe kumona nani Yandi kele. Ya kele Nzambi na beto, Emmanuel.

⁸⁶ Ntangu Yandi vwandaka awa na zulu ya ntoto, Yandi siamisaka ti Yandi vwandaka Nzambi. Siamisaka ti Nzambi vwandaka na kati ya Yandi, samu bidimbu ya Nzambi vwandaka landa Yandi. Yandi tubaka, “Kana Mu ke sala ve bisalu ya Tata ya Munu, na yina beno kwikila Munu ve. Kasi kana mu sala bisalu ya Tata ya Munu, kana beno ke kwikila Munu ve, beno kwikila bisalu, kidimbu.” Emmanuel! “Munu na Tata ya Munu kele mosi. Tata ya Munu fidisaka Munu. Mpe mutindu Yandi ke fidisa Munu, na yina Mu ke fidisa beno. Tata, ba fidisaka Munu, kele na Munu. Yandi kele na kati ya Munu mpe ke sala bisalu ya Yandi mosi. Ya kele Nzambi na kati ya nzutu.”

⁸⁷ Lot kuzwaka ve ntomo ya yawu na ntwala ya kubeba? Ntangu, yandi monaka Nzambi me monisama na kati ya nzutu, ke kudia mwana-ngombe, ke kunwa miliki ya ngombe ya kento, ke kudia dimpa na zulu ya kuwa, mpe telemaka na mukongo ya Yandi ya kubaluka na tenta, mpe na kiyingilu ya muntu “Munu.” “Mu, ke mona ti Abraham kele kibyadi ya yinza, mu. . .” Na nzonzolo yankaka, “Mu ke sala yawu kuzabana na yandi.”

⁸⁸ Nani Yandi vwandaka? Na yina Yandi tubaka, “Abraham, wapi kisika kele kento ya nge, Sarah?” Ya ningisaka yandi. Nzambi, na dibanza ya Klisto, kumaka nsuni.

Yandi tubaka, “Yandi kele na kati ya tenta, na manima ya Nge.”

Sarah sekaka. Mpe Yandi tubaka, “Samu na yinki Sarah me seka?”

⁸⁹ Ntangu Emmanuel kumaka na kivumu ya kento, na kisika ya kutalana mutindu théophanie, Yandi tubaka, “Mutindu ya vwandaka na bilumbu ya Lot, mutindu mosi ya ke vwanda na nkwezulu ya Mwana ya muntu.”

⁹⁰ Ntangu Yandi vwandaka na zulu ya ntoto, bantumwa yina kwendaka na Nsangu ya mbote, yina mpe Bawanzio talaka na zulu ya makunzi ya Mazulu, ba-couloir ya Yinsi ya Nkembo, samu na kutala Yawu. Beno bayina ke na kusunikaka Masonuku, mutindu mu ke mona beno ke na kusunika, ya Ntete ya Timothée 3:16. “Kukondwa ntembe dinsweki ya kinzambi kele nene: samu ti Nzambi kumonisamaka na nzutu, kwikilaka na yinza, monaka Bawanzio.” Bawanzio telamaka samu na kutala Nzambi. Ba ningisaka mbala mosi bansinga ya bawu na ntuala ya Yandi, na kudilaka, “santu, santu, santu,” ntangu Yandi vwandaka ya kuvwanda Kuna, mutindu Dikunzi ya Tiya, na mikembo ya Mazulu. Mpe ntangu Yandi kumaka muntu, Bawanzio kwizaka mpe talaka na lweka samu na kumona Yandi, Yehowa, kumaka nsuni. Kieleka, “Kukondwa ntembe dinsweki ya kinzambi kele nene.”

⁹¹ “Mu ke pesa nge kidimbu ya kukonda nsuka,” samu ti Nzambi kumaka nsuni na kati-kati ya beto. Yandi zingaka na kati ya nzutu. Ya ke vwanda kidimbu ya kukonda nsuka. Kaka ve na mivungi ya kutala mpe kukwikila, kasi samu na beno Branham Tabernacle, mpe samu na yinza yayi ya nkú, samu na kukwikila ti yina kele Nzambi. Nzambi pesaka kidimbu yina. Yesu tubaka, “Mutindu Tata ya moyo fidisaka Munu, mpe kwizaka na Munu, mpe vwandaka na kati ya Munu; na yawu fidisa munu nge, Tata ya moyo na kukwenda na nge mpe kuvwanda na kati ya nge, kidimbu ya kukonda nsuka. Bidimbu yayi ke landa bayina ke kwikila. Tala, mu ke vwanda na beno, ata mpe na kati ya beno, tii na nsuka ya ntoto. Mu ke vwanda na beno. Nsuka ya yinza, mu ke vwanda kuna na beno.”

⁹² Muntu mosi, mutindu mu tubaka na ntuala, zola kumisa Yandi fyoti, Nzambi ya nkufi. Yandi vwandaka muntu; Nzambi vwandaka sadila muntu. Nzambi vwandaka sadila nsuni yina Yandi vangaka, Yandi mosi, samu na kuvanga na nzila ya Yandi, “Mpe samu na kulakisa Yandi bana mingi ya babakala,” me tuba Masonuku, “na nzila ya Mwana yina ya kutumama. Na nzila ya mwana mosi, nyonso kubwaka. Na nzila ya Mwana ya kutumama, nyonso ke zinga, yina ke kwikila.”

“Nzambi na beto,” kidimbu, tubaka ti yina ke vwanda kidimbu. Yandi zolaka mingi kutala Yandi mosi mutindu “Mwana ya muntu,” muntu Yandi mosi, kaka muntu. “Mu kele kima mosi ve; Mwana lenda sala kima mosi ve na Yandi mosi.” Kasi ya kele Tata wandaka na kati ya Yandi, Emmanuel, Nzambi.

⁹³ Bébé, Nzambi, Yehowa Nzambi. Mwa bébé yina bokaka, yina wandaka Yehowa. Beno lenda mona yawu? Nzambi ke zinga na kati ya bébé mosi.

⁹⁴ Nzambi wandaka zinga na kati ya mvula ya buntwenya. Wapi mutindu ya ntwenya Yandi wandaka? Yandi wandaka mbandu. Ntangu ba zimbisaka Yandi na nzila ya tata ya Yandi mpe mama ya Yandi, ba talaka samu na kumona Yandi, mpe ba monaka Yandi na tempelo. Yinki Yandi tubaka, mutindu ntwenya ya bakala? “Nge zaba ve? Nge zola ve ti mu fwana sala bisalu ya Tata ya Munu?” Mbandu samu na bantwenia.

⁹⁵ Mutindu bakala mosi, na ba-pompe nionso ya yinza ba pesaka Yandi, bima nionso na zulu ya maboko ya Yandi, samu na kukuma ya kulutula nene na kati ya babakala nionso, ya kulutula mvwama na kati ya babakala nionso; Nani lendaka tuba na bantu kisika mbisi wandaka na makala na yinwa ya bawu, lendaka basisa masa ya kulutula kitoko na mabulu ya masa mpe kubalula yawu na vinu, yina lendaka soba konso kima yina Yandi ke zola kusoba; yina lendaka baka mwa mampa tanu mpe kudisa mafunda tanu. Na ngolo na maboko ya Yandi samu na kukuma muntu ya nene, kasi yandi soolaka kaka samu na kuvwanda mputu. Yandi wandaka ve na ntoni ntangu Yandi kufwaka. Yandi zolaka defa mosi. “Emmanuel, yayi ke vwanda kidimbu.” Wapi mutindu Nzambi ke kwisaka? Na bamputu. Wapi mutindu Nzambi ke salaka? Ya ke vwanda kidimbu ya kukonda nsuka, na bamputu, yina me longukaka ve.

⁹⁶ “Kidimbu,” tubaka profetese ya nene, Anne, ntangu Siméon telemisaka maboko ya yandi na tempelo, mpe na kusimbaka Mwana yina ya fioti na kati ya vunga ya yandi. Anne tubaka, “Ya kele kidimbu yina ba ke zonzila yimbi, samu na kubwa ya Israël, kasi kuvukana diaka, mpe, Nsemo na Bantu ya makanda.”

⁹⁷ Yinki? “Nzambi na beto,” ve na mvwama mpe na kima ya mpamba, kasi na bamputu. Me butuka na kati ya kidikilu, “Nzambi na beto.” Wapi mutindu ya bima Yandi salaka? Beno tala mbote bima ya Yandi Yandi tubaka. Beno tala mbote Yandi, yina Yandi tubaka.

⁹⁸ Samu ti, Nzambi Yandi mosi tubaka, “Yayi kele Mwana ya Munu ya luzolo, beno kuwa Yandi. Yayi kele Mwana ya Munu Yina mu me sepela na kuzinga. Beno kuwa Yandi.” Yandi tubaka, “Mu ke vwanda na beno ntangu nionso, tii na nsuka.”

⁹⁹ Yandi fidisaka bantumwa ya Yandi. Bawu yokaka ntoto, na bilumbu ya bawu, mutindu Nzambi wandaka mosi na

muntu. Bawu botikaka bantu na Nkumbu ya Nzambi yina, Yesu Klisto. Bawu zingaka pene-pene mingi na Yandi tii kuna Yandi monisamaka Yandi mosi na nzila ya bawu, na nzila ya bidimbu mpe mambu ya ngitukulu mpe makabu ya Mpeve-Santu. “Nzambi na beto.” Bawu longaka ti ya vwandaka na Nzambi mosi ya kieleka mpe ya moyo.

¹⁰⁰ Muntu me tunga mitindu nyonso ya bisume na zulu ya banzambi tatu to yiya, to banzambi zole, kasi ya kele na Nzambi mosi. Nsangu yina zolaka talisama dyaka na kilumbu ya nsuka.

¹⁰¹ Beno ke sala mbote na kuzwa dibanza ya beno ntangu yayi, beno zibula bantima ya beno. Beno lombamba na Nzambi na kumonisa yayi na beno, yina mu ke zola kutuba.

Ntangu Yandi kwisaka, Yandi lungisaka yina profete tubaka.

¹⁰² Mpe ntangu Yandi ke kwisa na bilumbu ya nsuka, na bamvula ya nsuka ya Nzambi, ntangu mvula zole ya ntama mpe ya nsuka ke tiamuka, Yandi ke kwisa kaka kieleka mutindu yawu pesamaka na profesu samu na Yandi. “Ya ke vwanda na Nsemo na ntangu ya nkokila.” Yinki zolaka salama? Emmanuel, Mwana mosi, Nsemo mosi, Nzambi mosi yina kwizaka zinga na nsuni, na bantu ya Yandi na Kilumbu ya Pentecote, ke kwisa mutindu mosi na bilumbu ya nsuka, samu ya ke vwanda na Nsemo ya nkokila. Yinki ya kele? Ya ke vwanda na kidimbu, kidimbu ya kukonda nsuka: Nzambi na beto, Nzambi na kati ya beto, Nzambi na nzila ya beto. Muntu mpe Nzambi me kuma mosi. Yesu kufwaka, yina Yandi pesaka luzingu yina ya ntalu, na lukanu ya Yandi. (Na Nsangu ya Lumingu me luta.) Samu ti, Yandi pesaka yawu lukanu, ti Yandi lendaka nata bana mingi ya babakala na Nzambi. Emmanuel na beto. Bantu ya Nsemo ya nkokila, ya ke benda bawu.

¹⁰³ Ntangu Nzambi pesaka kidimbu, “Yayi ke vwanda kidimbu. Nzambi ke zinga na kati ya nzutu.” Yandi banzaka ti ya ke benda bantu. Ya salaka yawu. “Samu ti bayina nionso ndimaka Yandi, na bawu pesaka Yandi Ngolo ya kukuma bana ya Nzambi.”

¹⁰⁴ Mpe ya zolaka benda bantu ya Nsemo ya nkokila ntangu Nsemo yina mosi lakisaka. Nzambi na Klisto kele mosi. Pierre tubaka, “Ti ya zabana na beno, ti Nzambi me sala Yesu mosi yayi, Yina beno komaka na kulunsi, nyonso zole Mfumumu mpe Klisto.” Kidimbu, ya yimbi yina ba me zonzila, kasi Bansemo ya nkokila kele awa.

¹⁰⁵ Mutindu longi ya ntama ya Nsangu ya mbote, ntangu nsangu ya pentecote bandaka na kubwa, kilumbu ya ntama ya Docteur Haywood, kaka na ntwala . . . Yandi, mu banza, ve . . . Mu banza ti ntangu yandi vwandaka na ya kulutila mbote, kilumbu mosi ntangu Mpeve bulaka yandi. Yandi vwandaka powete, na ngaanda ya mulongi. Yandi bakaka kilapi ya yandi mpe yandi bulaka yawu.

Ya ke vwanda na Nsemo na ntangu ya nkokila,

Beno ke mona kieleka nzila ya Nkembo;
 Na nzila ya maza kele Nsemo bubu yayi,
 Ba me zika na Nkumbu ya ntalu ya Yesu.
 Ntwenya mpe kiboba, beno balula ntima na
 masumu ya beno nionso,
 Mpe kieleka Mpeve-Santu ke kota;
 Samu ti Bansemo ya nkokila me kwiza,
 Ya kele dyambu ti Nzambi mpe Klisto kele
 Mosi.

¹⁰⁶ Minda ya nkokila! Kana beto ke tambula na Nsemo ya nkokila, kidimbu ya nkokila, na yina ya zolaka vwanda Nsemo mosi mpe kidimbu mosi, kidimbu ya Kukonda nsuka. Na yina bidimbu mosi ke landa Nsemo ya nkokila. Fiou! Beno me mona Yawu? Beno lenda bakula Yawu? Ya kele Nsangu ya Nowele yayi. Bansemo ya nkokila, bidimbu ya Mesiya ke tambula na Yawu, ke tambula na Nsangu. Bansemo ya nkokila kele awa.

¹⁰⁷ Ya kele yimbi yina ba me zonzila. Ba ke manga beno, bampangi ya beno. Nani mangaka Yandi? Bampangi ya yandi. Bawu zolaka kumona Yandi kusala bimangu. Kasi ntangu ya kumaka na Calvaire, wapi kisika bawu nionso vwandaka? Ntangu ya ke kuma na ntangu yina ya lukanu ya nene, kisika Nzambi na kati ya Kieleka ya Yandi mpe Biblia ya Yandi ke monisama, wapi kisika bawu kele? Bawu kwendaka ntama.

¹⁰⁸ “Ya ke vwanda na kidimbu yina ba pesaka na beno. Mpe bidimbu yayi ke landa. Bisalu yina Mu ke sala, beno mpe ke sala yawu; ya kulutila yayi, samu Mu ke kwenda na Tata ya Munu.”

¹⁰⁹ “Ya ke vwanda dyaka na Nsemo na ntangu ya nkokila.” Oh, kilumbu ya mpimpa yayi yina beto lutilaka! Kasi bamvula makumi yiya matuti me zimbana, na nzila ya kusungika ya ntete, ya kulonga Nsangu ti Nzambi mpe Klisto kele mosi, ti Nzambi monisamaka na nsuni. Yandi solaka na kuzinga na kati ya nzutu ya muntu. Mpe bubu yayi ba ke sala Yandi kima mosi ya kuvwanda na zulu ya kiti ya kimfumu, ba ke sala Yandi mwa nganga-Nzambi mosi, bayankaka na kati ya bawu zola kuvutula Yandi na philosophie, bayankaka zola kusala Yandi profete. Kasi, mpangi, Yandi kele Nzambi na kati ya beno, Nzambi me monisama na kati ya nzutu. Wapi mutindu?

¹¹⁰ Wapi mutindu bawu zabaka ti Yandi vwandaka Nzambi na kati ya nzutu? Yandi tubaka, “Kana Mu ke sala ve bisalu ya Tata ya Munu, na yina mu me tuba na nge luvunu. Kasi kana mu sala bisalu ya Tata ya Munu, beno ke kwikila yawu.”

¹¹¹ Mpe ntangu yayi kima mutindu mosi. Nsangu ke vutuka dyaka na bilumbu ya nsuka, Nsangu ya Nani Yandi kele, yina Yandi kele. Emmanuel yina ke zingaka na kati ya beno, na bisalu mosi yina Yandi salaka, monisamaka Yandi mosi na nzila ya beno, bima kaka mosi yina Yandi salaka. Ya kele Nsemo ya nkokila. Ba me zonzila yawu yimbi. Ya kele nzila ya mpasi.

112 Ya zolaka kutuba kima samu na mfumu ya ntwenya ya mvwama, kasi ntima ya yandi vwandaka na nzala, na kukwiza na Yesu, mpe tubaka, “Rabbi, yinki mu fwana sala na kuzwa Luzingu ya Kukonda nsuka?”

Yandi tubaka, “Zitisa Misiku.”

Yandi tubaka, “Mu salaka yawu kubanda bumwana.”

Yandi tubaka, “Nge zola vwanda ya kulunga kuna?” Yandi tubaka, “Landa Munu.”

113 Kasi yandi kwendaka na mawa nyonso. Ya vwandaka ntalu mingi. Kana yandi zolaka pesa Yandi mwa mbongo mpe kutunga dibuundu ya nene kisika mosi, ya ke kukitula yandi mosi mambele, yandi zolaka kusala yawu kukondwa mpasi. Beno ke mona ve mutindu ya kele bubu yayi na kati ya bumvwama? Ya vwandaka na bayankaka.

114 Ya kele kaka ve mvwama, kasi mputu; mingi ya bawu me katuka na kati-kati mabulu ya poto-poto, mpe nyonso yina, bawu mangaka samu na kuzabana. Samu ti, ba zabaka Yandi ve. Yandi vwandaka Emmanuel. Bawu tubaka, “Yina kele kutonga. Yina kele—yina kele dyabulu. Yina kele télépathie mentale. Yina kele—yina kele Béélzébul.” Milongisi ya kilumbu, mabuundu ya bawu ya nene, tubaka, “Buzoba.”

115 Kasi Nzambi tubaka, “Ya kele kidimbu ya Seko, kidimbu ya kulutila, kidimbu ya kidimbu nyonso, ti Nzambi kele na beno, ata mpe na kati ya beno, tii na nsuka ya yinza.” Beno tala kidimbu ya beno ya kulutila. Yawu me luta kidimbu nyonso. Yawu ke kidimbu ya ntete. Actes 19, bantu yango zolaka vutuka mpe kundima kidimbu yina, ntete bawu kuzwa Mpeve-Santu, Actes 19:5. Kasi, mukwikidi yina vwandaka na Biblia, mpe vwandaka na mulongi ya mbote yina vwandaka monisa ti Yesu vwandaka Klisto, kasi ntete bawu kota na Yawu . . . Mpe kumona kidimbu, bawu zolaka kwiza mpe kuzwa mbotika, me tentika maboko na zulu ya bawu mpe me kuzwa Mpeve-Santu. Ya kele kieleka.

116 Kasi na ntangu ya Nkokila, Bansemo kele awa. Mpe ba me sawula Yawu. Ba me seka yawu. Ya kele yimbi yina ba zonzaka. Profete tubaka ti Ya ke vwanda yimbi yina ba zonzaka, “Ditadi ya disakuba.” Yimbi yina ba zonzaka, kusekaka, muntu ya masawula; Emmanuel na kati ya beto, na kusalaka luzolo ya Yandi na nzila ya beto.

117 Oh, bubu yayi, mpangi ya munu ya bakala, mpangi ya munu ya kento, beno kwikila kidimbu yina. Beno tala na kidikulu ya ntima ya beno mosi, mpe beno mona kana beno kele na lenda ya kutuba na beno mosi. Beno me mona kidimbu yina mivungi monaka. Nzambi na kati ya nzutu, na kuzingaka na kati-kati ya bamputu, bantu yina kele na nsatu, yina ba me losa na nganda. Beno me mona kana beno lenda bakula Yawu. Nzambi na kati ya ntima ya beno, Nzambi na kati *awa*. Beno tala mbote mpe beno

mona kana Yandi monikisaka Yandi mosi mbote, na mawete mpe lembami, mutindu Yandi salaka.

118 Mwa bamvula fioti me luta, ya vwandaka na mwana-kento mosi yina kwendaka na lukolo ya nene, mpe, na bayinzo ya yandi mingi kuna, yandi kumaka mwa fioti na mayele ya yimbi, kubanda malongi ya yinsi ya yandi ya ntama, mutindu mama na kati ya yinsi ya yandi mosi. Mpe kilumbu mosi yandi bakaka lukanu, mwa bamvula zole na ntwala, samu na kutala diaka mama ya yandi. Yandi sonikilaka yandi télégramme mpe tubaka na yandi ti yandi ke kwiza na masini ya mutindu yayi, samu na kukutana na yandi na gare. Na yina, yandi nataka mwa muntu ya mayele ya yimbi kintwadi na yandi. Mpe yandi kumaka na mayele ya yimbi, yandi mosi. Mpe yandi nataka yankaka kintwadi na yandi, yina vwandaka mutindu mosi ya balubakusu ya bilumbu yayi, yina me zaba nionso, mwana-kento ya ntwenya.

119 Mpe ntangu yandi kumaka na gare, ntangu yandi bandaka na kubasika na train, yandi talaka. Mpe mama ya yandi telemaka kuna, yandi talaka na nionso yina vwandaka na kati ya yandi, samu na kumona kisika mwana ya yandi ya kento vwandaka. Mpe ntangu mwana-kento yina vwandaka na yandi, mama. . . monaka yandi na kizizi ya yandi nionso ya bamputa, mpe maboko ya yandi nionso vwandaka pela. Mpe yandi talaka mpasi, kiboba, mpe yandi talaka boma. Mpe mwana-kento yina vwandaka na Marie ya fioti, tubaka na yandi, “Mu ke kukiyufula nani kiboba yayi ya mawa kele?”

120 Mpe mwana-kento yango vwandaka na nsoni ya mama ya yandi. Yandi tubaka, “Mu zaba ve. Mu zaba ve nani yandi kele.”

121 Mpe mama ya yandi, ntangu yandi monaka mwana ya yandi ya kento, yandi kimaka mbangu na yandi mpe yandi yambaka yandi, yandi bandaka na kupesa yandi bézé.

122 Yandi kwendaka ntama, yandi tubaka, “Mu zaba nge ve. Nge kele na muntu ya yimbi,” samu yandi zolaka ve kuvukana na muntu ya mutindu yayi ti muntu yankaka ke seka yandi mpe ke sawula yandi.

123 Ya vwandaka na bakala mosi, ntwadisi ya train, vwandaka ya kutelama kuna. Yandi kangaka kento yayi ya ntwenya na dipeka. Yandi tubaka, “Nsoni na nge, nge kima ya mawa! Mu ke bambuka moyo na diambu yango mbote.”

124 Mpe bantu vukanaka samu na kuwa yina salamaka. Mpe yandi kangaka mwana-kento yango, mpe yandi tubaka, “Mwana-kento yayi ya ntwenia, ntangu yandi vwandaka ve na bangonda sambanu, yandi vwandaka na mwa berso ya yandi na zulu. Mpe mama ya yandi ya ntalu, kento ya kulutila kitoko yina mu me monaka ntete ve,” tubaka kiboba yina ya mutwadisi. Yandi tubaka, “Yinzo simbaka tiya na yina mama ya yandi vwandaka yanika bilele. Mpe bankalani nionso kwisaka mbangu, vwandaka boka. Bawu monaka yawu. Mama talaka

yawu ata fioti ve. Yawu vwandaka na lweka ya velanda ya yinzo. Mpe batiya vwandaka ya kusimba mbote, mpe yawu kwendaka na kati ya mupepe.”

¹²⁵ Mpe yandi tubaka, “Ba lendaka ve kusimba mama yina ya fioti. Bébé ya yandi vwandaka na étage.” Mpe yandi tubaka, “Bawu nionso bokaka, ‘Nge lenda tobula ve tiya yina—yina.’ Kasi yandi bakaka bulanketi yina vwandaka na diboko ya yandi, yina vwandaka na zulu ya yawu, mpe ya vwandaka lele ya kupola na masa. Mpe yandi losaka yawu pene-pene ya yandi, mpe na kati ya tiya yandi kwendaka, mpe yandi mataka na étage, yandi banzaka ve samu na kigonsa ya yandi mosi. Na yina ntangu yandi kumaka kuna, yandi zabaka ti yandi lendaka ve kufika bulanketi na yandi mosi samu na kuvutuka. Kasi, samu na kuvulusa kitoko ya mwana ya yandi ya kento yina zolaka landa yandi, yandi fikaka bébé na kati ya bulanketi, mpe kimaka mbangu na kati ya tiya, na kizizi ya yandi ya mpamba mpe misapi ya maboko mpe maboko. Mpe yawu yokaka nsuni ya nzutu ya yandi, mpe kondisaka matama ya yandi tii na mikwa, mpe bebisaka yandi, zengaka nsuki ya yandi, mpe . . . nyonso na mikwa na musapi ya yandi.”

¹²⁶ Yandi tubaka, “Yandi kumaka yimbi, ti nge kuma kitoko. Yandi pesaka kitoko ya yandi, yandi bikaka nionso yina yandi vwandaka na yawu, samu yandi vulusa beno. Mpe na yina beno ke telama mpe beno ke vwanda na nsoni ya mama yina ya ntalu?”

¹²⁷ Mpangi, ntangu mu ke mona Nzambi, Nzambi ya Mazulu, zimbisaka kiti ya Yandi ya kimfumu, kitoko ya Yandi, mpe nyonso yina Yandi vwandaka; samu na kubutama na zulu ya kikunku ya matufi ya bantu, ke vwanda ya kufuka na bilele ya vunga, samu na kuseka na nzila ya bidimbu ya Yandi mpe mambu ya Yandi ya ngitukulu, samu ba bokila munu diabulu; mu ke vwanda na nsoni ya Yandi? Ve, tata. Ti yinza ya kalasi kusala yina bawu zola kusala. Samu na munu, Yandi kele kidimbu ya kulutila. Mpeve-Santu na kati ya munu ke boka. Ya lendaka sala ti mu sala mutindu yankaka mpe kuvwanda muntu ya kilawu, na nzila ya yinza yayi, kasi mu lenda manga Yandi ve Yina salaka mingi samu na munu. Yandi bakaka kisika ya munu na lufwa. Yandi bakaka kisika ya munu na Calvaire. Yandi salaka bima yayi nionso. Yandi kulumukaka na Mazulu, na bakiti ya kimfumu ya mpembe, samu na kukuma muntu; samu na kumeka mpasi ya munu, samu na kuluta na mpukumunu ya munu, samu na kuzaba wapi mutindu kuvwanda mutindu ya mbote ya muvukisi na kati ya munu, samu na kutwadisa munu mpe kutwadisa munu na Luzingu ya Kukonda nsuka. Mpe na nzila ya bumputu ya Yandi, mu me kuma mvwama. Na nzila ya lufwa ya Yandi, mu me pesa Luzingu, Luzingu ya Kukonda nsuka.

¹²⁸ Beno manga Yandi ve. Beno vwanda ve na nsoni ya Yandi. Beno vwanda ve na nsoni ya Yandi. Kasi beno yamba Yandi,

mpe beno tuba, “Yinga, Mfumu ya munu ya Luzolo, pesa munu mutindu bawu salaka na Kilumbu ya Pantekote, Mfumu. Pesa munu Mpeve-Santu. Tiamuna Yawu na kati ya ntima ya munu. Mu ke kipe ve yina bantwenia ke tuba. Mu ke kipe ve yina yinza ke tuba. Mu ke tala bawu ve. Mu ke tala na Nge.” Yinki ya kele? Kukuma ya dibuundu? Ve. Kidimbu ya kulutila, Emmanuel, Nzambi na beto.

Beto sambila.

¹²⁹ Na kati ya kivinga ya bantu na suka yayi, ya kele na bayankaka awa yina ke zola kutuba, “Samu na munu, mu ke na nsoni ya luzingu ya munu. Mu ke na nsoni ya Yandi ve. Mu ke na nsoni ya luzingu ya munu,” samu na kupesa dikabu na Yandi Yina kumaka kitoko ve, mpe ba vwezaka Yandi na yinza?

¹³⁰ “Muntu ya mawa, yina zaba mpasi. Beto nionso bumbaka bizizi ya beto na Yandi,” tubaka profete. “Ba vwezaka Yandi mpe losaka Yandi. Kasi, beto talaka Yandi mutindu muntu yina ba me pesa kitumbu mpe ba me bula na Nzambi. Kasi, Yandi lwalaka samu na masumu ya beto, mpe waka mpasi samu na masumu ya beto ya nkú; kitumbu ya ngemba ya beto kubwaka na zulu ya Yandi, mpe na bamputa ya Yandi beto belukaka.”

¹³¹ Beno ke vwanda na nsoni ya Yandi? Kana beno kele mutindu yina, beno kwisa na autel mpe beno balula ntima ya masumu ya beno. Kana beno kele ve na nsoni ya Yandi, mpe beno kele na nsoni ya luzingu ya beno yina beno talisaka na Yandi, kima mosi ya yimbi. Nge ke na nsoni bambala mingi, na ntwala ya mfumu; na ntwala ya bakento ya nkundi ya nge, na ntwala ya nkundi ya nge ya bakala, na ntwala ya nkundi ya nge ya kento to nkundi. Nge vwandaka na nsoni ya Yandi, Emmanuel yina vwandaka zinga na kati ya nge. Telemisa maboko ya nge mpe tuba, “Nzambi, lemvo kila munu samu mu vwandaka na nsoni.”

¹³² Mfumu ya beto mpe Nzambi ya beto, na kukikulumusa nionso mpe na lutondo nionso beto ke lomba Nge na kundima lemvo ya beto, na suka yayi, samu na bifu ya beto nionso, samu na beto nionso na bantangu me kubwa. Beto kele ya kubwa samu na kutelama Kieleka. Beto kele ya kubwa. Ntangu ba ke zola kubokila beto nkumbu mosi ya yimbi, mutindu, oh, “exalté,” to kima mosi ya yimbi yina kele ve mutindu yina, kasi bantangu yankaka beto ke vutuka mutindu Pierre mpe tiya beto mosi na tiya ya mbeni. Lemvo kila beto, Mfumu.

¹³³ Mvula ya malu-malu ke belama na beto. Bika ti beto banda na ngunga yayi, mpe kumona kidimbu ya kulutila ya Nzambi na kati-kati ya beto, Nzambi ke zinga na beto, ke zinga na kati ya beto, ke sala, ke sala kieleka mutindu Yandi salaka. Mpe Bansema ya nkokila kele awa.

Lemvo kila beto bifu ya beto. Lemvo kila masumu ya beto.

¹³⁴ Mpe beto kele mingi na lemvo, Mfumu, ndima Dikabu ya Nge ya Nowele, Mwana ya Nzambi, samu na kuzinga na kati ya nzutu

ya beto, fundu-fundu ya beto, samu na kuzinga na beto, samu na kusantisa nzila ya Yandi na nzila ya Menga ya Yandi Mosi, mpe kupesa beto kivuvu ya Luzingu ya Kukonda nsuka. Beto ke tonda Nge. Mu ke tonda Nge, Mfumu, samu na Dikabu yayi ya nene ya kitoko ya Nzambi, samu ti Yawu kele dikabu, dikabu ya Mpeve-Santu, ba-fiancé na Nkumbu ya Mfumu Yesu. Beto kele na kyese na kuzwa Yawu. Beto ke tonda Nge samu dibuundu ya beto me telama samu na kidimbu yina, samu kidimbu me telama samu na Malongi ya Dibuundu. Beto me telama samu na Yawu. Ya me telama samu na beto. Mpe ya me zabana na kati-kati ya Baklisto na yinza ya muvimba bubu yayi, ya nkonga ya bantu ya mputu, yina zaba kima ve na nzila ya 8 mpe na Bala-bala ya fioti, na Jeffersonville; Emmanuel yina, Dikunzi ya Tiya na ntoto ya kuyuma, Yesu ya Galilée, Mpeve-Santu ya Pentecote, me monisama na nzila ya bidimbu nyonso ya Emmanuel na Bansemo ya nkokila. Beto ke vutula matondo mingi, Mfumu. Mpe ti bayankaka kumona Yawu mpe kuzwa Yawu. Samu, beto ke lombamba yawu na Nkumbu ya Yesu, mpe samu na zola ya Yandi mpe samu na zola ya Dibuundu. Amen.

¹³⁵ Mu banza ti mu ke vwandaka na ndinga ya muyimbi. Kana mu lendaka vwanda na ndinga ya muyimbi na ntangu yayi, mu ke zola kuyimba na beno nkunga ya munu ya luzolo, mu sonikaka na nkundi ya munu ya ntalu, William Booth-Clibborn.

Yandi kulumukaka na nkembo ya Yandi, disolo
ya moyo,
Nzambi ya Munu mpe Mvulusi kwizaka, mpe
Yesu vwandaka Nkumbu ya Yandi.
Ya kubutama na kati ya kidikilu, nzenza na
yina ya Yandi Mosi,
Nzambi ya mawa, ya maza ya meso mpe ya
mpasi.

O mutindu mu zola Yandi! Mutindu mu ke
kembila Yandi!
Luzingu ya munu, nsemo ya mwini ya munu,
nyonso ya munu na nyonso!
Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

Yinki kukikulumusa, yina me natina beto
mpulusu;
Ntangu na kati ya lufwa ya nkokila, ata kivuvu
mosi monikaka ve; (Na manima nsemo ya
kutengama kwisaka!)

Nzambi, ya ntalu, ya lutondo, tulaka na lweka
kitoko ya Yandi,

Kulumukaka na kidikilu, kidikilu ya kufuluka na fumier,
samu na kubutuka kuna na kati.

Kulumukaka samu na kusosa, kununga mpe kuvulusa moyo ya munu.

O mutindu mu zola Yandi! Mutindu mu ke kembila Yandi!

Kupema ya munu, nsemo ya mwini ya munu, nyonso ya munu!

Kiyidiki ya nene kumaka Mvulusi ya munu, Mpe muvimba ya Nzambi ke zingaka na kati ya Yandi.

¹³⁶ Mpe na yina Yandi kele na kati ya munu, mpe mu kele na kati ya Yandi. Mpe na kati ya beno . . . “Na kilumbu yina, beno ke zaba ti Mu kele na kati ya Tata, Tata na kati ya Munu, mpe Munu na kati ya beno, mpe beno na kati ya Munu,” Nzambi, Emmanuel, na beto.

¹³⁷ Ya vwandaka Emmanuel yina monaka George Wright, yina vwandaka kuna na ntangu yayi; ya kulala kuna vwanada kufwa, ntangu badokotolo yiya lutaka yandi. Ya vwandaka Emmanuel yina, ntangu Yandi zolaka defa kivumu, ntangu Yandi zolaka defa ntoni. Yandi pesaka meso ya munu, yandi tubaka, “Kwenda tuba na Mpangi George, ‘MUTINDU ME TUBA MFUMU. Yandi ke timuna ntoni ya milongi yina mpe bima yina ke na kusekaka yandi.’”

¹³⁸ Ya vwandaka Emmanuel yina. Ya vwandaka Mosi yina, samu na yina me tala mwa bibulu, kilumbu yankaka yina na kati ya mfinda. Ya vwandaka Mosi yina, samu na yina me tala Margie Morgan yina kele ya kuvwanda kuna, nionso yankaka me bikana. Ya vwandaka Yandi yina mosi bukaka balenda ya yintu, ba-sense ya nzutu, samu na kutalisa Yandi mosi na yinza bubu yayi, na nzila ya beno, na yina Bansemo ya nkokila ke na kusemaka. Nzambi vwanada na kyadi, nkundi.

¹³⁹ Mu ke baka ntangu mingi ya beno. Bika beto meka yawu. Pesa beto note, “O mutindu mu zola Yandi!” Bantu yikwa zaba yawu?

O mutindu mu zola Yandi! Mutindu mu ke kembila Yandi!

Luzingu ya munu, nsemo ya mwini ya munu, nyonso ya munu na nyonso!

Kiyidiki ya nene kumaka Mvulusi ya munu, Mpe muvimba ya Nzambi ke zingaka na kati ya Yandi.

[Mpangi Branham ke na kuniunguta *Yandi Kulumukaka Na Nkembo Ya Yandi*—Mu.]

Mutindu mu ke kembila Yandi!

Kupema ya munu, mwini ya munu nyonso, nyonso ya munu!

Kiyidiki ya nene kumaka Mvulusi ya munu,

Mpe muvimba ya Nzambi ke zingaka na kati
ya Yandi.

¹⁴⁰ Ntangu yayi kele ntangu samu na Yandi na kulakisa lemvo ya Yandi. Mama mosi ke nata mwa bébé awa, na leucemie, cancer na kati ya menga ya yandi. Ya kele yimbi samu na bébé?

Nzambi, tala ndinga ya munu, tuba Ndinga, mpe yawu ke vwanda mutindu yina.

Samu, Mfumu, Nge tubaka, “Tuba na mongo yayi, ‘Katuka awa.’ Kutula ntembe ve. Ya ke vwanda.”

Na Nkumbu ya Yesu Klisto, Mwana ya Nzambi, mu ke fundisa diabulu yayi ba me bokila leucemie. Kimbevo ya nzutu ya mwana yayi, yawu ke kwenda. Yawu fwana bika yawu. Na Nkumbu ya Yesu Klisto, bika yawu vwanda mutindu yina.

. . . nsemo ya mwini ya munu, nyonso ya munu
na nyonso!

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

¹⁴¹ Mutindu mu zola Yandi! Mu lenda kaka ve kubika Yawu kukwenda. Mu zola, kaka mutindu Jacob, kukangama na Yawu.

. . . kembila Yandi!

Kupema ya munu, nsemo mwini ya munu,
nyonso ya munu na nyonso!

“Yayi ke vwanda kidimbu.”

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

¹⁴² Yandi kele ve mbote? Beno ke na nsatu ya kusambila Yandi ve? Kaka na Kimpeve, beno sambila kaka Yandi. Beno zimbana kaka beno mosi ntangu yayi. Beno vwanda ve na nsoni. Mpeve-Santu kele awa. Yina kele Mpeve-Santu. Beno vwanda kaka swi, na mutindu ya beno mosi.

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

Beno bawu yayi.

Yina ke kukikulumusa, ke nata beto mpulusu;
 (“Ya ke vwanda kidimbu.”)

Ntangu na kati-kati ya mpimpa ya ndombe,
kukondwa ndambu ya kivuvu na kati ya
nsemo;

Nzambi, ya ntalu, ya lembami, me tula na
lweka bunene ya Yandi, (Beno banza na yina
Yandi salaka!)

Kulumukaka samu na kusosa, kununga mpe kuvulusa moyo ya munu.

143 Beto telemisa maboko ya beto ntangu beto ke yimbila yawu.

O mutindu mu zola Yandi! Mutindu mu ke kembila Yandi!

Kupema ya munu, nsemo ya mwini ya munu, nyonso ya munu na nyonso!

Kiyidiki ya nene kumaka Mvulusi ya munu, Mpe muvimba ya Nzambi ke zingaka na kati ya Yandi.

144 Mfumu, ata mbala mosi ve ti beto ke lenda na kubakula bimvwama, muvimba ya Mpeve ya Nge, tii kuna beto ke mona Yandi na kilumbu yina ntangu Yandi ke kwisa. Beto lendaka vwanda ya kulala na fundu-fundu. Mu lendaka vutuka na fundu-fundu ya ntete, kasi yina ke vwanda ve na boma ata fioti ve. “Mu zaba ti Yandi ke bokila, mpe mu ke pesa mvutu. Mpe na yina mu ke mona Yandi mutindu Yandi kele. Nzutu yayi ya kubeba ke soba mpe ke salama mutindu na nzutu ya Yandi Mosi ya nkembo, na yina Yandi kele na kiyeka ya kulutila bima nionso na Yandi mosi.”

145 Mu ke vutula matondo na Nge samu na dikabu ya Nowele ya Klisto na kati ya ntima ya munu, kuzaba ti ya kele Klisto mosi, samu ti Yandi ke salaka kima mutindu mosi. Yandi ke sala munu kuwa mpe ke sala mutindu Yandi salaka na mbandukulu, na kisadi ya Yandi.

146 Mu ke vutula matondo samu na Dibuundu ya yinza ya muvimba, ya lunungu, yina ba soolaka ntete, mpe yina ba bokilaka, mpe ba tulaka kidimbu, mpe ba tumaka na Nzutu yina. Mu ke mona bawu na Asie, na Afrika, na Rome, bisika nyonso, na Indiana, na kizunga, na Afrika. Bisika nionso na yinza, mu ke mona ti Dibuundu yina ke na lunungu, yina me zaba ti Nge me kwisa na nzutu. Mpe Nge tubaka ti, “Konso mpeve. . .” Na Biblia ya Nge, Nge tubaka, “Konso mpeve yina ke funguna yayi ve, kele mpeve ya yimbi, mbeni ya Klisto. Konso mpeve yina ke pesaka kimbangi ya kima mutindu mosi ve, ti Klisto me kota na nzutu ya beto, kele mpeve ya mbeni ya Klisto.”

147 Tata Nzambi, sadisa munu na ku—kuningisa dikala ya tiya yina kuna. Mu lenda mona bawu, Mfumu, kuna. Beno me mona bantu ya kimbevo ya wazi na mielo, beno tala Inde kuna, na Taj, na mwelo, bima yayi ya mputu vwandaka komvula na ntoto, makulu ve. Beno tala bana-babakala yayi ya ndombe ya bamputu kuna na Afrika, mwa maboko ya bawu ya fioti na zulu. O Nzambi, fidisa munu, Mfumu. Ti Wanzio kukwiza na dikala ya Tiya, pela na kati ya moyo ya munu, Mfumu, mpe katula mvindu nionso mpe malembe, ti mu fwana kwenda mutindu nkuni ya tiya ya Nzambi, samu na kukatula na tiya bayina kele na kati ya mudidi ya nene.

148 Sakumuna mwa dibuundu ya munu, Mfumu. Oh, mu lenda mona mwa nzila yina ya mabaya awa, mpe kumona bantu ya ntalu. Bantu ke nata matoma ya bawu, ke seka bawu, samu ti bawu me telemisa maboko ya bawu, ke kembila Nzambi. Kasi kilumbu mosi Yesu ke kwisa, mpe bima nionso ke salama mbote. Beto ke vwanda ve na nsoni, Mfumu. Beto ke vukana na Paul ya kiboba, mpe ke tuba, “Mu ke na nsoni ve ya Nsangu ya mbote ya Yesu Klisto, samu ti Yawu kele Ngolo ya Nzambi samu na mpulusu, samu na Lusingu ya Kukonda nsuka, samu na muntu nyonso yina ke kwikilaka.” Sadisa beto na kuzinga mutindu yina, Tata. Beto ke sambila Nge ntangu yayi na Mpeve, na bisika ya Mazulu. Beto ke tonda Nge samu na kotalana yayi na suka yayi. Na Nkumbu ya Yesu. Amen.

149 Kaka mbala mosi dyaka, beno zola?

O mutindu mu zola Yandi! Mutindu mu . . .
(Mfumu Yesu, . . . ? . . . na Nkumbu ya Yesu.)

. . . nyonso ya munu na nyonso!
Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

150 Beno zola kaka mingi ya Yandi, mutindu yina ve, Doe? [Mpangi-kento Delores me tuba, “Yinga.”—Mu.] Ya kele mpangi ya munu ya kento, mpangi ya munu ya kento na nsuni.

O wapi mutindu . . .

Bokilo ya munu ya kento. Ba zola mingi ya Nzambi. Mpangi Grimsley ke kwisa, ke zola mingi ya Nzambi.

. . . nyonso ya munu na . . .

Yawu yina. Mpangi Wood, ke kwisa. Mpangi Collins, mulongi ya Methodist; kento ya yandi, bayankaka.

. . . kumaka Mvulusi ya munu.

Yayi kele bisalu ya Mpeve-Santu ke na kubokila, Yandi mosi.

. . . ke zingaka na kati ya Yandi.

O mutindu mu zola . . .

Beno tuba kaka yawu na mutindu ya beno mosi ntangu yayi.

. . . Mutindu mu ke kembila Yandi!

Kupema ya munu, nsemo ya mwini ya munu,
nyonso ya munu na nyonso!

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

151 Mfumu, Mfumu, bawu yayi, mameme ya kilanga ya Nge. Disa bawu, Mfumu, na Mpeve ya Nge. Ba ke kukipesa bawu mosi na Nge, Mfumu. Ba ke pesa balusingu ya bawu na Nge. Bawu telemaka samu bawu ke na nsoni ya Nsangu ya mbote ya Yesu

Klisto ve. Beto zaba ti Nge kele awa, Dikunzi ya nene ya Tiya, Klisto, Mpeve-Santu.

. . .kembila Yandi!

Kupema ya munu, nsemo ya mwini ya munu,
nyonso ya munu na nyonso!

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

¹⁵² Tuba kaka na bandinga ya nge mosi ntangu yayi. Ya kele Mpeve-Santu yina nataka beno awa. Beno tuba kaka na Yandi ti beno zola Yandi. Mpeve-Santu mosi yina vumbulaka bawu na Pantekote, beno ke telama awa ke dila, ke dila, ke yangalala.

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

Kukondwa kukitwadisa, nsuni mpe menga ya
Yandi, (Mwa bébé mosi na kati ya yandi.)

Yandi bakaka nzutu ya muntu, monisaka
dikani ya kubumbama.

O dinsweki ya nkembo, Munkayulu ya
Calvaire,

Mpe ntangu yayi mu zaba ti Nge kele “MU
KELE.”

O mutindu mu . . . (O Nzambi!) Mutindu mu ke
kembila Yandi!

Kupema ya munu, nsemo ya mwini ya munu,
nyonso ya munu na nyonso!

Kiyidiki ya nene kumaka Mvulusi ya munu,
Mpe muvimba ya Nzambi ke zingaka na kati
ya Yandi.

¹⁵³ O zola yina zolaka ve ti mu kwenda, zola yina ke kangaka ntima ya munu na zulu ya bima nionso, lembami ya Mvwandulu ya Mpeve-Santu; na yina dibuundu ya Yandi kele ya kutelama pene-pene ya autel, ke fukimina, ke tala na kati ya kidikilu, ke mona kima mutindu mosi bantu ya ndwenga monaka, Nzambi kumaka nsuni.

. . .kumaka Mvulusi ya munu,

Mpe muvimba ya Nzambi ke zingaka na kati
ya Yandi.

¹⁵⁴ Kana ya kele na kima ke tambula mbote ve na luzingu ya beno, beno funguna yawu ntangu yayi na Mvwandulu ya Mpeve-Santu, na yina na pima nionso. Beno tala na kati ya ntima ya beno, beno mona kana ya kele na kidikilu kuna yina lenda telama muntu ya masawula, na zulu ya funguna ya beno ti Yandi kele Nzambi.

. . . kufulukana nyonso ya Nzambi ke zingaka na kati ya Yandi.

¹⁵⁵ Na bayintu ya beno ya kukulumusa ntangu yayi, beno sambila kaka, beno mosi. Yayi kele Mpeve-Santu. Beno lenda ve kuwa mawete mpe lutondo ya Mpeve ya Nzambi, lembami, Luzingu ya nsuka?

¹⁵⁶ “Kisika ya kele na bandinga, ya ke suka. Kisika ya kele na profesi, ya ke kubwa. Kisika ya kele na luzabu, ya ke kubwa. Kasi ntangu zola ke kwiza, ya ke suka mvula na mvula.” “Zola ke vibidilaka. Ya ke kukitombolaka ve. Ya ke kukizangulaka ve. Ya ke salaka ve yimbi, ata fioti ve. Kasi Yawu ke kulumusaka beto, ke lembikaka beto, ke tulaka lembami na kati ya moyo ya beno.”

¹⁵⁷ Beto sambila ntangu yayi, mosi na mosi na mutindu ya beno mosi, na kutonda Nzambi samu na yina Yandi salaka.

¹⁵⁸ O Mfumu, na lembami ya nkunga yayi, na kusamunaka na nzila ya bafungula, makelele ya mbote ve, kasi muingu yina zola kutuba, samu na beto, Nani Nzambi ya beto kele, mutindu Ndinga me tuba yawu. Ntangu yayi miziki ke tuba yawu. Ntangu yayi bantima ya beto ke tuba yawu, Mfumu, bankadulu ya beto na Nge. Beto ke kwisa na ntwala. Ba ke telama. Ba ke zolaka Nge. Kintwadi, Mfumu, beto me telema mutindu mameme ya Nge, mameme ya kilanga ya Nge. Beto ke zolaka Madia yayi, Ya kele mbote samu na mioyo ya beto. Mpe beto zaba ti Nzambi ke zingaka na beto. Beto zaba ti Nzambi vwandaka mpamba na kati ya Klisto, mpe Klisto vwandaka ya mpamba na kati ya Dibuundu.

¹⁵⁹ Mpe awa beto me telama bubu yayi, ntangu bansambulu ya mutindu na mutindu, mpe mitindu nyonso ya—ya badenomination mpe ba-phase, mitindu nyonso ya bakundima, kasi dyaka Ndinga ke na kuzonzaka samu na Yawu mosi, Nzambi me monisama. Kidimbu ya kulutila yina Nzambi me monisama na kati ya nzutu ya bantu ya Yandi, ke sala bidimbu mosi mpe mambu ya ngitukulu, na kumonikaka na mutindu ya Dituti, Dikunzi, na kuzingaka na kati-kati ya beto, na kubakulaka bantima ya beto, na kutubaka na ntwala ya beto bima yina ke kwiza, na kubelusaka kimbevo ya beto, ke salaka ti beto kangama mingi na Mazulu ti beto ke kuma na ngaanda ya beto mosi. Tii, beto ke sala bima ya ngitukulu, samu na bana ya yinza; mutindu bawu ke telama mpe ke seka, mpe ke banza ti beto kele bilawu, kaka mutindu bawu salaka na Pantekote, na kutubaka, “Bayayi nyonso kele ya kukola ve malafu?”

Kasi mutindu mu zola Yandi! Mutindu mu ke kembila Yandi!

Kupema ya munu, nsemo ya mwini ya munu, nyonso ya munu na nyonso!

Kiyidiki ya nene kumaka Mvulusi ya munu,

Mpe muvimba ya Nzambi ke zingaka na kati ya Yandi.

¹⁶⁰ Beno telemisa maboko ya beno ntangu yayi samu na kupesa nsilulu na lukwikilu ya beno na Nzambi, bansilulu ya beno na Nzambi, kukwikama ya beno mpe ya kukwikama na Nzambi, dibuundu kuna?

¹⁶¹ Beto ntangu yayi, Mfumu, beto mosi awa na Nge, na manima ya lusakumunu yayi ya Mvwandulu ya Nge, zaba ti Nzambi me monisama dyaka na kati ya nzutu ya beto. Yandi kumaka fundu-fundu ya beto, Yandi kumaka ya beto; Yandi sabukaka Yandi mosi na Nzambi samu na kukuma muntu, ti muntu lendaka zinga na kati ya Yandi. Mpe beto me kuwa Nge na suka yayi, na bampeve ya beto. Beto ke mona bisalu ya Nge mpe bakumonisama ya Nge. Beto zola Nge. Beto ke sila diaka na Nge: samu na kuzitisa Nge, samu na kuzola Nge, mpe kusala nyonso yina beto zaba mutindu ya kusala, yina ke sepelisa, samu na kuzinga yina ke vwanda mutindu Baklisto, yina ke nata nsoni ve, kasi ke vwanda lusakumunu samu na Nkumbu ya Nge ya nene ya santu. Yayi beto ke sala, Mfumu, mutindu bana ya Nge, na Nkumbu ya Yesu Klisto. Amen.

¹⁶² Mu zola kuyufula beno kima mosi ntete beno baka kiti ya beno. Beno me kuwaka ntete kima mosi ya lembami? Lembami ya Mpeve-Santu! Muntu ve ke tuba ndinga; ke kwenda kaka na ntwala, ke kwisa. Nkembo ya Nzambi! Beno me mona?

¹⁶³ Mu vwandaka sambila mpe vwandaka longoka, bilumbu zole, na yayi. Kulutila yina. Kubanda Lumingu me luta, to me luta, yinga, Lumingu.

¹⁶⁴ Mutindu kidimbu yina ya Kulutila, mutindu Nzambi tubaka, “Mu ke pesa bawu kidimbu. Mu ke vwanda na kati ya nzutu ya bawu. Mu ke vwanda mutindu bawu; ba ke vwanda mutindu Munu.” Yandi tubaka Bawanzio talaka. To yandi tubaka... Bawanzio tubaka na mivungi, “Beno tala na kati ya kidikilu, beno ke mona yina mu zola kutuba.” Kidimbu yina vwandaka kaka ve samu na Bawanzio. Yawu vwandaka kaka ve samu na mivungi. Ya kele samu na yinza, na kumona mpe kukwikila ti Nzambi ke zinga na kati ya nzutu.

¹⁶⁵ Mpe na nzila ya dikabu ya nsuni yina, Yandi santisaka nzutu ya beto, ti Yandi zolaka zinga na kati ya beto. Nzambi na kati ya beno. Klisto na kati ya beno. “Tala, mu kele na beno ntangu nyonso, tii na nsuka ya yinza.” Beno zimbana yayi ve. Beno bumba yawu na kati ya bantima ya beno.

¹⁶⁶ Mu kuzwaka mwa makabu ya nene ya kitoko ya Nowele, camera ya film, mpe bima mingi yankaka, minduki mpe bima, yina bantu ke zolaka munu, ba ke pesaka munu. Mutindu mu ke sepela na yawu!

¹⁶⁷ Kasi, oh, yayi, Luzingu yayi ya Kukonda nsuka, kivuvu ya kusakumuka yina Klisto ke zinga na kati ya beto, ti muvimba

ya Yandi ke zinga na kati ya beto, ke sala beto kutelama mpe kusala mutindu yankaka. Samu ti, beno, ntangu beno ke sala yawu, beno ke kuma muntu ke kima na bima ya yinza. Beno ke kuma kizieti. Nge ke banza ti nge me kufwa na bima ya yinza, mpe ke zinga na luzingu ya malu-malu. Ntangu yayi beno kele nzenza na yinza. Beno kele nzenza samu ti beno me tuba pwelele, na nzila ya bisalu ya beno, ti, “Ya kele na Mbanza Yina Mutungi mpe Kiyidiki kele Nzambi.” Beno me mona? Mpe beno ke kipe diaka ve bima yayi ya yinza, kasi beto kele bantu ya kukangama na Mazulu ke na kuingila Mbanza yina Yina Mutungi mpe Kiyidiki . . . ya Nzambi. Beto kele Nkuna ya Abraham samu beto me kwikila na Mfumu Yesu Klisto, mpe me kufwa na bima ya yinza, mpe me vumbuka dyaka na lufwa na mvumbukulu ya mutindu ya Yandi; samu na kutambula mutindu Abraham kusalaka, na kusosaka Mbanza yina ke kwiza, na kubakaka Ndinga ya Nzambi, na kubokilaka nyonso yankaka, samu na kusekisa bawanzio na yinzo ya beto, mutindu Abraham kusalaka, minati-nsangu ya Nzambi, yina nataka nsangu. Oh, wapi ntangu! Ke tuba ti beto zola dyaka ve yinza. Beto zola Yandi, mpe Yandi kaka. Yandi kele Mvulusi ya beto.

¹⁶⁸ Mutindu beno ke sala nzietolo na suka yayi, beno nata Yandi na beno. Beno bika Yawu kwenda ata fioti ve. Beno vwanda mbote na moyo ya beno, bilumbu nyonso ya luzingu ya beno. Nzambi sakumuna beno ntangu yayi na yina beno ke kwenda na bakiti ya beno, mpe bana kele na makabu ya bawu. Nzambi sakumuna beno.

¹⁶⁹ Ba ke sambila yawu? Sadisa bawu awa, mpangi-kento. Mu ke sambila tii na nsuka.

Mfumu Nzambi tala kyadi na mpangi yayi ya bakala. Katula mpeve ya kulawuka malafu na yandi, Mfumu. Ti yandi vwanda ya kulawuka na Vinu ya malu-malu ya Nzambi. Na Nkumbu ya Yesu Klisto. Amen.

¹⁷⁰ Yayi kele kaka Mazulu ve? Bantu yikwa ke kuwa yawu, kaka yayi, kaka lembami? Muntu ve zaba yinki ya kutuba. Mu zaba kima ve ya kutuba. Mu kele kaka—mu kele. . . Mu ke na kukondwa bampova. Mu—mu zaba ve yinki ya kutuba. Kaka Mpeve ya Yandi ke kota kaka, beno me mona.

¹⁷¹ Yinki ya kele? Beno ke kuma bana-mameme, mpe Yembe kele awa samu na kutwadisa beno na Madia ya mwana-dimeme, Madia ya mameme. *Yayi* kele Madia ya mameme, “Muntu ke zinga kaka na dimpa ve, kasi na konso Ndinga yina me basika na yinwa ya Nzambi.” Bampeve ya beto ke zinga na zulu ya Yawu.

¹⁷² Mu banza ntangu yayi ti mu ke mona nkundi ya munu ya mbote, Nzonzi Robinson, kana beno ke vingila kaka na kivinga ntangu ya yinda tii mu lenda soba bilele ya munu, kuvutuka, samu ti mu ke toka.

¹⁷³ Mpangi Neville ke baka lukutakanu ntangu yayi, samu—samu na makabu samu na bana. Mfumu sakumuna beno.

¹⁷⁴ Ntangu nionso beno yimbila *Yandi Kulumukaka Na Nkembo ya Yandi*. Ntangu beno ke sala yawu, beno bambuka moyo na yina beto ke kwikilaka na Yandi, “Muvimba ya Nzambi ke zingaka na kati ya Yandi.”

Nzambi sakumuna nge, Mpangi Neville.

¹⁷⁵ [Mpangi Neville ke tuba na Mpangi Branham—Mu.] Yinga, kana nge zola munu. [“Yinga.”]

¹⁷⁶ Mpangi Neville me yufula munu kana mu ke vutuka diaka na nkokila yayi, samu na kulonga diaka na nkokila yayi. Mu ke yinaka kubaka lukutakanu ya yandi. Kasi mu kele awa, ya kele samu na yina mu kele awa. Ok, mu ke vutuka na nkokila yayi, kana Mfumu kuzola, kuzonza na lukutakanu. 🐦

59-1227M Kidimbu Ya Kulutila
Branham Tabernacle
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org